

襄垣縣志

襄垣縣志卷三

名宦傳

名宦傳者德澤及人而可以不朽者也舊志亦載名宦如大史公之所記述班范之所稱揚循吏並無多人亦足見作史之難矣襄邑志肇自前明其後勝朝乾隆光緒時曾再爲修舉而名宦無傳凡事之有關於宦績者悉以附之庶以作前事之師云爾

金

喬宸傳

喬宸崇祀名宦祠雖代遠年湮而案牘無考在當時嘉惠羣黎政績燦爛已可概見觀其座中自銘謙抑自持並可想見其爲人云

喬宸自銘座中云宅無一區不儉不質而廩宇足以居田無一畝不農不桑而衣食足以厚家無一僕不傭不僱而得供己之人足以充部曲世無一官不進不猷而籍任子之蔭足以補職員爾無致主之術澤民之才今享福旣已若是其用心宜何如哉乃若富不知足貴不知止無厭之欲何時而已患中性之易流防侈心之漸啟緬思古人尙且有勤勤几丈以識其過佩韋弦以矯其惰吾恐久而易忘之也故書之以爲座中之銘

襄垣縣志

卷之三 名宦傳

一

韓俊傳

韓俊崇祀名宦祠想當時之政治清明百廢俱舉固無待言而事實可考者卽天會間盜賊蜂起人民塗炭俊能躬冒矢石勦匪安民復能創修大城以圖久安功甚偉也其詳見於楊丹撰之韓公修城記

楊丹云襄垣縣古韓州也封域宏廣殆將百里而遙東連巨鎮北背喬峯峻嶺大壑多人跡之所不能至者國家收復之初奸雄繼踵蟻聚蜂屯嘯集林谷每黨不啻數千人號曰紅巾動則彌崗落阜旌旗繽紛鞀鼓震疊數窺是邑直欲鯨吞虎噬當是時故城多坍塌郊邑相望舉無壁壘在城之民將扶老携幼以延旦夕之命耳幸令尹韓公抱忠貞之節懷慘怛之愛率衆死守披堅執銳不顧矢石前攻後突若陷無人之境賊遂稍稍引去於是增修外城且戰且築寇至則荷戈而禦敵寇退則擊釜而赴工故不日而具士民額手相慶曰我輩倖保首領得以完聚者韓使君之力也天會九年春韓公屬其耆老議之曰羣醜雖逃遺類未盡內城修於倉卒姑濟時一然地甚狹隘不能容衆今將建大城以周其外可復許乎聞者莫不忻然樂從遂經營相度計貧富爲等差區方定力咸適均平故人皆踴躍盡瘁更相勸督不數月而告成易曰說以使民民忘其勞信斯言也其城周環六里三十步其墉高二丈厚二尋之半其溝深二仞其上睥睨具焉闢以四門層樓上起壯麗可觀故倉廩府庫可得而長保也神祠佛寺可得而修葺也庠序可得而開設也市井可得而陳列也居民可得而安定也編氓咸喜室家相慶人人皆自謂更生之福矣嘗觀有建一橋以通險阻達一水以利

灌溉其善雖小尙可得頌之矧築城鑿池修而兼創者乎今成久大之功興無疆之利雖垂竹帛勒鼎鐘不爲過矣朝廷嘉其有功遷以榮秩重循良也迄今公去六載襄垣一境無虞四民安業孰非沐公之德者乎余因卽其事而述之

元

倒刺沙傳

倒刺沙蒙古人席皇族之威監臨漢地不傲不侈尙能關心民瘼維持孔教亦屬地方之福星云

張碧有于闐沙公政績碑記云皇元奄有天下設官分職於親民之官慎簡尤至必擇蒙古色目材幹廉慎者以監臨之位於尹簿丞尉之上所以利澤斯民者德至溥矣至元改元冬十一月于闐沙公伯祥以承事郎勅監襄垣縣下車之後令行禁止號令一新施於有政難以枚舉其大者陶禮器關儒宮課農桑均賦役甘水嚙城驤渠增堤以備墊溺之虞民調輸帑以布拆絲而去科賠之擾實義倉以申著令闢荒田以益貧民信賞罰以息盜賊明號令以絕訴訟搜剔民隱剏吏權是皆守令之當爲公獨聲明而力行之不三年綱舉目張百廢俱興是以憲府舉循吏爲一道之最嘉績表著有如是者公諱倒刺沙伯祥其字也本西城古族始由國子選入工部史再遷江西省掾考滿陞除是職云

明

襄垣縣志

卷之三 名宦傳

一一

袁有常傳

袁有常直隸眞定人洪武時知襄垣縣事政寬不弛民罹大飢多方撫綏卒無失業

白行中傳

白行中陝西清澗舉人景泰時知襄垣縣事愛民禮士有循吏風後徵拜御史

張曉傳

張曉陝西三元進士成化時來守襄垣廉謹愛民政無不舉有清水明鏡之謠崇祀名宦祠後官至按察

使入省志

劉瓚傳

劉瓚直隸清苑進士成化時知襄事適值歲飢賑濟有方全活甚衆入省志

甯智傳

甯智舊志不載其籍貫成化時爲襄邑令謂其創建城樓有仁聞崇祀名宦祠

張鵬翰傳

張鵬翰陝西慶陽進士正德時宰襄清苦自甘均荒田溢額於全徵中復以其餘創置學田貧士賴以拯

恤入省志

劉明傳

劉明山東濮州人正德時知襄事精明廉慎吏民畏懷修築城池功垂後世入名宦祠

邑人劉龍記其修城云予自留都得謝還里邑耆王祝等來謁曰吾邑城自濮州劉侯築完垂二十年闔邑賴以寧宇維候之澤不敢忘也請爲記之以志我思予嘉是役久矣茲家居乃獲身庇固樂爲道之按邑城傳自趙襄子始築故號襄垣舊城在甘水北唐武德中復置韓州築城甘水之南天會間盜起鄰邑多陷邑宰韓俊才傑士也大爲戰守之計顧城敞且隘不足恃增築外城且戰且築賊不敢逼皆引去今所居者是也國朝景泰間邑宰甯侯智成化間邑宰柳侯豸相繼修築皆不忘百姓之患時稱其賢正德間兩河山東流賊大擾城以歲久頽敝民皆危懼臥不帖席時濮州劉侯明宰邑躬閱城池曰是惡足與民守哉乃以農隙戒事經營規畫悉有良法庶民子來不假鞭朴逾月百雉皆興周六里高二丈厚稱之城上之塗可行大車邑城之良無以加此濮州以疾故任邱趙侯永淳繼至爲設女堞以終其事於是民皆倚爲金湯雖有潢池之弄萑苻之警不足虞矣濮州之政甚與民宜而明敏殊絕人不敢欺修城之役若出緒餘今相去已遠民猶德之不忘且礪石以紀其績曰見城如見濮州也城居一日卽濮州一日之賜使久於其任爲民造福將有進於古之循吏者惜哉不竟其施徒使斯民思之不已時移事改猶諄諄乎言之不置也近商河賈侯樞新葺四門門上各欲建樓會遷秩不果成今昌邑葛侯縉下車屬有警報視城上女堞弗稱及城樓闕者即趨令修完益爲雄壯亦可謂急於民患矣

襄垣縣志

卷之二 名宦傳

三

張冕傳

張冕山東萊陽進士嘉靖時知襄事舊志稱愛民重士有循吏風

賈樞傳

賈樞山東商河進士嘉靖時知襄事清約節省用法明恕創修城樓官至參議

葛縉傳

葛縉山東昌邑進士嘉靖時知襄事政教嚴明民安盜息歷官至本省巡撫後升侍郎入省志

賈希顏傳

賈希顏河南祥符人嘉靖時宰襄政尙寬平時傳魯警市野悉驚乃處鎮靜而料理防禦之地方恃以無

恐崇祀名宦祠

董遂傳

董遂河南嵩縣進士嘉靖時來宰襄邑鋤強扶弱善政爲多密察捕緝人稱神明又性至孝聞母病棄官歸後母病愈復職政成徵拜給事中官至本省副使入省志

王尙直傳

王尙直隸昌黎進士嘉靖時爲襄垣令能釐錢糧飛詭宿弊催科無擾擢主事

邑人郝良臣記其均糧云先王建邦啟土度地居民其分田制賦之法相沿非一日矣自夫井田廢

而阡陌起大道隱而橫斂興凡古人合併爲公之意殆泯沒漸滅莫之存什一於千百矣雖漢唐而下間有英君誼辟孜孜講求然古意卒不可復豈其法不宜於後世哉亦其勢之漸趨者然也我皇祖御極之初首命儒臣夏元吉等集議詳定著爲令典徵於夏者則曰稅徵於秋者則曰糧其先後次數稍倣唐楊炎兩稅之制而中復加捐之蓋不泥於古而自無不合眞足以侔迹商周而陋近代於下風矣吾邑自國初時里額八十有三糧額夏麥七千七百二十八石有奇其瘠鹵不堪薦蕘者實三之二其有司復不與酌減往往取盈焉於是官之所徵者恒浮於歲之獲年復一年而民之逋負逃竄者日急且多矣至宣廟時父老呈縣由是得疏於朝下監司勘驗乃爲二項凡流民遺棄之田則任民佃種名曰拋荒即半徵數也凡居民常種之田則仍舊起辦名曰本身即全徵數也由是上不費於催科下不苦於輸納逃者漸以復荒田漸以墾而糧之該徵亦足以待辦矣至武廟時或有令復徵所蠲者吾邑溢出額外之糧五百四十石有奇會慶陽張公來牧檢知之嘆曰拋荒免科本爲厚下也今茲復徵之無乃給民以致貳乎於是按邑中起科之田而攤前所謂溢出之數每石二八算徵名曰均攤浮佃卽哀多益寡之遺意也是後法久弊生富豪之家重賄里書巧爲飛詭致令全甲混淆鬼域難辦而邑之有識者徒以切齒噴目矣乃嘉靖丙辰我昌黎王公以妙齡登制科奉命來尹吾邑徧詢疾苦眞知前弊乃昕夕憂惶惓惓焉思所救正因獲一二點胥鞫訊之凡均攤馬免影射於各家者始得其梗概而其間猶有曲爲掩護恡吝不肯承伏者公研究益力百方鉤索

襄

垣縣志

卷之二 名宦傳

四

雖合勺之微必有端委而後已戊午秋始復舊額而竣焉昔先正邱文莊公欲除兼併之患立貢賦之法後竟格於不行今我公不二載而刷清纍年之弊其有光於文莊公不淺矣予遷官方岳被放西歸適邑博士趙君與諸庠生徵予爲記予不文顧予昔典銓曹類不敢蔽賢沒善况均糧一節雖學士大夫嘗苦於包賠者皆重沐膏澤湔滌虧累將不獨子惠困窮已也予援筆數語亦以附異時口碑之萬一耳若夫勒鼎彝垂竹帛鴻名駿烈響震廟堂則另有所記者在也予不敢妄爲序述併查明實徵條欵俱別著於碑陰云公諱尙直字舉之松坡其別號也

蕭守身傳

蕭守身河南河內進士嘉靖時來牧襄邑約已裕民重修學宮及縣署官至郎中

李貴和傳

李貴和河南祥符進士嘉靖時蒞襄任持身廉潔泣政精明省費節財百姓感戴惡少年滋事必痛懲之一時地方無賭博者創修邑乘公之力也徵拜給事中官至參議

邑人姚九功記其修城云襄邑之沿革徒置不一前人記之詳矣李侯來宰是邑推豈弟之心勵精明之政不期年而政成化行常目擊傾圯欲更新之第恐勞民傷財不忍起大功動大衆隆慶元年九月魯賊大舉入寇破石州屠劫甚慘公深爲百姓憂越明春卽大戒於衆增築城巔各五尺許濬塹二尋有餘又以堞臺頻修頻壞反耗財力乃悉砌以磚記堞一千五百有奇翊門敵臺八座四樓

亦量薦而崇之事舉而民即樂從工興而事乃底績蓋由公之畫茲舉也工不盡民之財役不盡民之力故樂爲赴公易曰悅以使民民忘其勞語曰擇可勞而勞之又誰怨此之謂也時戶積耗半縮故額公白諸當道汰通絕覈實丁哀多益寡劑量而歸併之此非尹鐸損戶數以保障晉陽之遺意手其他革吏弊詰奸慝抑豪橫禁賭博捐資以修學宮節財以省冗費善政不一而足而冰蘖清操一毫不染宜其由心達政而衆美之咸集也邑士民索余言以誌不朽予因樂爲之記公諱貴和字于中號節齋河南祥符人登嘉靖乙丑進士時贊定判簿陳力教諭賈錄司訓宋時儒曹相咸與有勞而督役鄉民王斌等皆得書於碑陰云

呂坤傳

呂坤河南甯陵進士萬歷時宰襄興利除弊襄人德之專祠祀焉其時邑人參政姚九功知府賈天爵等有識分子參與其事必其功在地方可以爲後來者之模範云後官至本省巡撫

呂坤鄉約所記云萬歷甲戌余筮宰襄垣秋八月抵舍視事明年乙亥冬今中丞鄭公撫三晉謂雲中繁億難於試令疏三晉久任者調焉冢宰以余請上從之乃移余大同襄之士民不以余不肖當速去也胥慘慘動離思既強余圖之像矣行日大雪繽紛泥塗載道父老數百人又強易余烏相與震哭於堂署鄉先生觴余遠郊庠諸君濡衣淖履拜余於原野遠落僻寨之民又相續執名牒而伏哭於道左者凡六十一聚幾千人有戴香而涕者有曾爲余大創而號泣從車不能去者有小兒拜

襄

垣縣志

卷之三 名宦傳

五

跪於車前者有再越宿而至南關驛者僚儕租餞伶優亦流淚奏樂哽咽不能仰視明年丙子爲余祠又明年爲碑嗟嗟民情之厚亦至此哉以余涼德之人叨食茲土歲餘矣諸所供需孰非百姓膏血而毫髮無補焉方用爲媿乃百姓依依有餘情風俗褻摯忘令之大惡而小惠是思也余何敢承抑將曰某何功德於我邑民而惟不甚虐也我邑民猶不忘用以風來者云爾余何敢承昔余之在邑也蒙昧無達識一令下一政行於民情舉無當也民乃大拂惟時所師事者雙峯姚公西坪賈公實指命之諸縉紳長者及士及父老實箴戒之俾不迷於嚮往以速大戾何德與功而百姓之念余若斯也往謂襄俗儂悍至載諸職官誣甚矣夫舊令之不忘厚矣薄施而侈享焉恥也二三子無重余恥設謂余未可棄也時一在口頰間樂矣安用祠倘藉二三子福靈不以大同之罪禡也異日復得道銅鞮相與周旋余豈忍忘二三子哉舊遊之地將睽睽凝睇焉三晉云何恐以未報祠也是掩余愛二三子之心也余欲毀祠辟碑乎恐拂二三子又懼弗從其改爲鄉約所夫邑之有鄉約以崇聖訓也士民暇則與聚焉談禮讓敦情好以保其田廬而俗亦長厚蓋有邑則有之矣向余念弗及此是闕然有遺罪焉請以余祠名之二三子其餘從則是舉也非直免恥亦以遠余罪也是二三子之益愛余也是歲戊寅正月上元日

田子堅傳

田子堅河南永甯進士萬歷時蒞襄任惠愛牧民清勤莅政立文昌祠設請益館課生徒禮齒德聽訟得

情不以自喜而哀矜之輕徭薄賦深得民心誠循良之著者

自請益亭云襄垣古韓地也春秋趙襄子城焉迄今三遷而古風猶存居民淳朴勤儉好禮來牧者多幸其易治余前以侍御黜官秦判再轉而牧茲邑履任初有名公碩俊抱負經猶者接踵而來余以言余延之爲上賓天下郡邑皆設有賓館襄垣舊無是館特借於東署陋弗展褻敬孰甚焉余罔敢仍其褻也遂捐俸資備材用度基址程土物選吏董工創於大門內東隅亭建三楹越三月而告成凡我佳賓偕會落之余拜客而請名其亭客曰亭非徒爲延賓爾也以請益爲名斯善矣余曰斯名何所取也客曰宰一邑難乎易乎有任之者莫不曰地不過百里民不過數萬吾撫而驅之無難色焉獨不思以百里萬民之命懸於一人之身中間變曲萬狀情欲多端吾必周思詳處各體其意而撫育之又起其敝而振刷之使咸遂赤子之願而無悲向隅者恐吾之才力不能必周其用也是豈易焉已乎然又有抱天下之才而以操刀者爲小試曰操斛艘者無意魚舟御宛駿者何閑駘駒以一邑之事之民吾豈治之不必傾駭天下之耳目取囂天下之口說可以一運而登諸理不可概謂之難也噫亦未之思耳夫天下之大一邑之積也天下之治邑治之積也一邑之事利害豈能盡悉乎機宜豈能盡識乎人情土俗豈能盡隨處而體協乎比之天下殆不可以繁簡勞逸而異視也一邑雖小而其樞要甚大若此則力易強而有功心難強而有智也其投之必欲合董之必欲理調停而振育之必如其願雖吾才亦有不能以自用者不可不謂之難也知其難則必不自有其才

不易其任則必廣乎其智凡夫計議可以補吾之牧治者皆虛受而求有益也虛以受益而求教之實廣亭成而盡延之可以集衆思而萃廟謨邑弗患其難也已茲則命名義也余頓首曰命之矣客退遂述求益之說刻石爲記

楊述中傳

楊述中四川富順進士萬曆時爲襄邑令安民重士勤於教養立秦晉書院號六豪會又舉邑人神童王基洪捐俸代聘生員黃增光女成嘉禮後基洪中辛卯舉人辛丑進士官至江西道御史提督南京學政其嘉惠士林概可想見

王懽傳

王懽直隸開州選貢崇正時任襄令嚴明果斷豪強斂跡盜賊破膽修城三壁俱以磚甃兆民賴之官至安徽巡撫

清

鄭僑傳

鄭僑福建海澄拔貢順治時任襄令以修學爲己任期歲告成遷移泮橋登祝石鼓丁酉黃梁室遂登科其重文教轉移士子心理厥功甚偉非徒迷信風水己也

趙良璧傳

趙良璧三韓蔭生康熙年任襄令修補女堞城樓捐俸作養士子扶助善人官至布政司

于嗣昌傳

于嗣昌江南金壇進士康熙時知襄垣事勞心撫字嚴革火耗季考識拔多名士入名宦祠

邑人趙必達記于公德政碑云公諱嗣昌字九扶號毅庵鎮江金壇人順治辛丑科進士文章聲望彪炳一時其先代有名臣爲金沙望族淵源蓋有自矣戊申春來蒞吾襄甫下車即嚴革火耗意尙撫字不事催科吾襄介在山僻地瘠民貧往往荒里逃戶逋欠不少緩征設法民甚便之先時俗亦健訟有兩造控詞者公讞決如流不異治家人事訟者咸感愧而去以故訟亦少衰舊例贖緩存貯官庫以備公事之需公悉除去又恐禁之弗久遠也勒石以杜其後民益載德焉定例十年審丁向來移甲換乙匿多報寡者不少公一稟公明廉知其弊逐戶挨審諸弊盡絕其他與學校教樹畜嚴保甲戒刑罰絕私派杜苞苴美政不可枚舉五年之間風盡淳良戶皆康樂吾襄人士方以爲公治一日則襄受一日之福孰意壬子歲公以績成疾遂舍吾襄之人士而逝也維時邑中四民無老幼男女莫不呼號涕洒如失父母淪肌浹髓感無以報乃設木主於崇福寺之書齋朔旦拜跪以誌不忘獨是公之受累於吾襄也初以迫於交盤繼又以逃絕里戶累年積逋及公捐館時共計六千五百金而欠在民者不下萬數五年之間公日以賠累爲兢兢除日用外無有長物卽治喪諸費俱無所出幸有冢君岸齋漢翔隨侍署邸百計以圖盡禮盡哀先遣子弟奉太夫人眷屬南歸岸齋公

獨身守公之靈旅櫬孤燈留襄三載悉鬻其產業以完夙逋至乙卯春方得扶櫬歸里去時邑人咸感公佈澤於生前哭泣相送於道皆失聲且私相謂曰公之惠如此清如此爲吾襄賠累又如此不知天之所以報施我公者宜何如厚且長也歲壬戌岸齋公奏捷南宮邑人聞之無不欣然相慶以爲天之報施果不爽矣而又未足盡吾襄人禱祀之願也至己卯春岸齋公奉簡命提學吾晉聞者益手舞足蹈不能自已是不獨一邑受公家先後之庇抑且全省沐公家先後之光天緣人事豈偶然哉岸齋公於初夏按臨上黨試畢來襄邑祭奠公之木主是時行臺設於察院邑侯屢請就館堅辭弗往仍守公神位卽於向所棲息處下榻焉以曩時書齋歲久傾圮欲移至舊楹之前高其基址擴其規模而不忍輕用民力卽出資鳩工人莫不踴躍從事不兩月而告成又置膏腴田二十畝爲書齋香火資噫真千古一時之盛事也吾邑之人匪直頌公之德祀公之神並誌公家之後先輝映洵足永傳不朽云

鄭宜傳

鄭宜山東臨青州貢生康熙時任襄令扶弱抑強人不能欺捐修大成殿櫺星門東周里田荒民累公給種賠賦民賴以生署中築有退思堂

少尹汪聖孫記其退思堂云己未秋余承乏襄垣履事之明日堂公鄭先生歡欣道故觴余署中新築之堂窻楹牖青白燦然亭宇曠達烟雲繚繞遠樹參差漳水韓山畢收入座顏其額曰退思先

生曰吾公餘退居朝夕於是凡吾之所爲必思其何以當理而無愧乃心子爲我記之嗟夫余天下之愚人無思慮者也遇事則發不暇思也未發而思則未至既發而思則無及以此終身幾及四十年不知所思且君子之於身世也寧必臨事而後思計較其美惡而避就之哉夫思慮之賊人也微而無閒雜而多端臨義而思利則義必不果臨敵而思生則戰必不力事君而思身則心必不忠至於窮通得失死生富貴自有命在詎可以思而擇處歟余固知不思之樂虛而明一而通安而和誠而無僞若飲酒而醉若閉目而睡將以是記退思不亦謬乎雖然要自有說焉今以先生之賢退食之暇披襟危坐撫衷默付一心一動惟恐不可以對百姓一念一事惟恐不可以質帝天兢兢業業常若有不能當理而抱愧乃心者此卽寡過未能之深衷固非若世俗之人營營於私慮患得患失者也經曰退思補過先生以之易曰無思也無爲也小子願學焉

高鎮傳

高鎮遼東歲貢康熙時邑宰恩威兼用寬猛並施十載之間政簡刑清後陞知州

王國治傳

王國治浙江錢塘人康熙時爲襄垣宰秉性溫和政尚渾厚停徵息訟與民無擾士民爲立去思碑

邑人劉瀆記其去思碑云嘗讀漢書循良吏後先接踵蒸蒸稱盛爲之上者增秩賜金更以璽書褒之匪重吏也重民也蓋其尹茲土者無事不父母斯民亦父之母之而不忍去我國治王公之令

襄垣縣志

卷之三 名宦傳

八

襄邑德器深沈恩膏廣被如清編審輕火耗修學宮革行戶種種德政利及民生是以官鮮催科之煩民有安堵之樂我襄人飲公之和食公之德曷其有極一旦官擢京師飄然遠舉我民寧不思耶思之難已爰記貞珉亦效峴山之往事以寄甘棠之愛云爾

袁良傳

袁良山東禹城進士康熙四十二年蒞任清廉自矢愛民課士惠恤有方編審聽訟人頌公平續修志書文詞博雅

忻州張星祥代襄人記其德政云我侯之尹襄也三年於茲矣侯之大德善政難更僕數人人感之人人自能言之且不徒一時之人言之萬世之人皆傳之夫言之一時就與傳之萬世無窮也哉憶癸未夏山左大水我侯單騎抵任貝州廣平間水浮馬首者數矣迎接供應不費民間一錢是歲襄邑失時不雨民多狼顧當事者猶徵比追呼幸我侯下車一切報罷緩征步禱甘霖應期大澍民歌舞之匪獨一年爲然矣嗣是而每逢朔望宣講聖諭開愚蒙也輕徭薄賦軫民艱也祈穀祀蜡重農祥也捐奉修廟師道尊也鄉飲舉行齒讓明也設學興化人材育也政暇課士文教修也不茹不吐請謁絕也買棺瘞死澤枯骨也何非我侯德與政相輔而行以子我元元者哉雖然利興矣而弊尤不可不除我侯蒿目時艱拯爾湯火灑之沃之祛爾夙害爬之梳之掃爾秕政簸之揚之至日用什物之類悉照時值現發則差役不得緣以爲奸矣四城巡邏之人守望有素而念其勞苦則下役不

得借端需索以累民矣編審一項嚴絕情面一塵不染則下無匿丁而上有力役矣誌書一刻二十八里之風公私不遺一百四十年之疆域官民兩利則倡捐劊劊而教化有據矣且也保甲嚴而鷄犬不已無警乎賭博懲而盜源不已悉杜乎聽斷明而拖累不已盡絕乎刑獄清而囹圄不己空虛乎此我侯日凜四知風清兩袖三年來德政之及我民者人人感之而不能言言之而不能盡尤欲傳之萬世怙其德遵其政相與受祐於無窮者也豈徒二十八里感恩被澤已耶邑侯名良字萬貞甲戌進士山東濟南府禹城縣人

汪德修傳

汪德修江南徐州碭山進士康熙五十年莅任明於吏治甫下車卽飭吏役去火耗革舖設平編審至誠禱雨輒應受事僅二十七日以憂歸德政之施不可勝紀

訓導王序記其德政云歲庚寅予得襄垣訓導缺赴會城領憑謁臺司見有伏撫軍轅門哀號而請者以千計詢而知爲襄垣士庶奪情借寇於其邑侯汪公者予承乏將於公爲屬襄事固樂聞至於公之事尤聞之而樂得其詳也衆以公之政未易立談試陳其略公以徂暑下車卽問民疾苦呼悍吏使聽約束不啻如柳州所云嚴有所飭戒而吏不敢爲奸故事徵地丁有加毫公憐吾襄土瘠而民貧急去之有告水災者公不憚酷暑躬履其畝廉得情狀爲緩征比故雖災民不爲害舊日新令至例舖設一切器物食用皆里費公悉退還之惟水取諸襄而已餘於民皆無預關防嚴密人莫敢

襄

垣縣志

卷之三 名宦傳

九

干以私事關請託蔑如也公廡僅避風日且棟宇傾欹將不堪或請葺之公曰民間罅漏多未補苴何懷居爲凡有易買卽給價如民間別無官價之說事關人命必親詣屍所立爲剖斷無留獄焉因勸婦女無輕生其諸大戒必以孝友爲先六月十三日受事二十八日卽審編公於編民貧者富者亡者興者消者息者宜擦宜陞宜頂宜平早已成竹在胸一升公座增補去留片言立定貧富老壯無不瀝胆輸心甫及經旬而二十八里之戶口且無所脫漏其公而明明而神又從來所未有者鄰邑百姓聞是編審方欲赴愬上臺請以爲式頒示闔屬潞城等邑尤爲切近更謀乞批調審昊天不弔而終天之訃音忽於七月九日而至矣計前後受事僅得二十七日美政之尤大彰著者如此他如發奸摘伏聰察如神養欲給求仁心爲質殆難以口舌傳也訃至之日闔邑男婦途號巷哭奔走失聲今我紳衿士庶颯沓赴省公請各憲欲以在任終制也予時聞之尙作然疑慮其言不無溢美乃赴入境所見一如乎所聞益信向之以告者皆其言之由衷也因卽口碑潤以文詞用昭來許將使後之君子有所矜式且以志民之不能忘也汪公諱德修字協克號近奄世籍江南之徽州徙居徐州之碭山者數世矣

柳國勳傳

柳國勳河南泰康監生康熙時宰襄邑修葺大成殿詳允完納屯糧祿米章程以節旁費者糞粥賑飢誠心禱雨士民德之

趙尙友傳

趙尙友直隸南樂進士康熙五十八年任時值歲歉糶粥賑濟親歷鄉村查訪不使民有失所編審甚公正

劉德潤傳

劉德潤正紅旗漢軍監生雍正時爲襄邑宰聽斷明允修築城池建石堤保護全城又修四城樓至今賴之

嚴繼陵傳

嚴繼陵湖北蘄水進士乾隆二年任慈祥愷悌聽斷和平革除新生公堂禮並鹽當陋規

李體中傳

李體中貴州南籠拔貢乾隆十七年任愛土恤民創修古韓書院並設師生膏火資士庶德之

安恒傳

安恒滿州正黃旗舉人乾隆二十四年任編審公正創建北門城石堤北城垣賴以鞏固

李廷芳傳

李廷芳四川長壽人丙戌進士乾隆四十四年蒞任興利除弊百廢俱舉公餘之暇著意文事續縣志條舉目張改署內退思堂爲寅畏堂

襄垣縣志

卷之三 名宦傳

十

自記其寅畏堂云廳事之左舊有堂匾曰退思善補過也夫過者人所不免况長民者其過尤易叢集無論簞簋不飭酷以佐貪固罪也非云過也即令自負皎然而苟不合手中道則有偏聽之過有姑息之過有本欲利民而適以害民之過余何人皆知不免顧不思所以補之與竊嘗謂補過莫如清心清心莫如主敬故先民有言勿謂一念可欺也須知有天地鬼神之鑒察勿謂一言可輕也須知有前後左右之竊聽勿謂一事可忽也須知有身家性命之關係忽謂一時可逞也須知有禍福子孫之報應推斯志也惟小心寅畏足以守之區歷八十餘年字湧湔堂且敬至即思有以新之而未遑也越數月欵益甚迺縮奉僦匠未匝月而工竣諸賓僚相與請曰業新其堂盍新其匾且錫之以嘉名斯稱徇其請即以寅畏名蓋素志也昔初公臬巡按河東於其思退堂後顏曰冰蘖堂余以地隘不能構兩堂仍其堂而易之亦猶冰蘖之志也夫

王元楫傳

王元楫雲南寶甯舉人嘉慶八年任和平渾厚息訟安民作養人材士風丕振

張力卓傳

張力卓湖南湘潭舉人道光三年任政治嚴明豪強斂跡興養立教廢修墜舉政績多端並散見各門

卓熙泰傳

卓熙泰廣西藤縣舉人道光二十三年任慈祥愷悌聽斷和平建修漳川書院考棚勤課士重斯文懲匪

安民境內肅然丁艱服闋復來晉省時惓惓以舊治關懷在東治同知任猶捐廉寄銀添膏火資至今士林戴德後陞道街任澤州府知府何東道

孫曰庠傳

孫曰庠浙江仁和進士道光二十九年任寬和平恕重修學宮振興文教裁革里總浮費立有碑記

孫福清傳

孫福清浙江嘉善舉人咸豐六年任實心任事政無不舉修城垣立義學保民興教練勇防堵創捐登雲會嘉惠藝林士民永戴

陳宗海傳

陳宗海順天大興人同治元年任節儉愛民勤於政事督辦團練歸併祿米捐積濟貧倉谷一千餘石添修王橋橋板五十餘間禱雨輒應重修龍洞廟建修龍洞山行宮並請加昭澤王封號立有碑記

陳松齡傳

陳松齡直隸獻縣進士同治九年任恩威並用寬猛兼施重修衙署糾工督辦不憚勤勞

李汝霖傳

李汝霖直隸永年進士同治十三年莅任勤政愛民剔除積弊歸併里甲是其最著規定條約永久遵從自今稱便

自定歸併里甲條約云錢糧一項國帑攸關自應依限全完以昭慎重襄邑錢糧向歸二十八里徵收到縣不齊里總即先佃解公私兩便原可遵行無如日久弊生津幫一層大為地方之害每屆輪充里總各議津幫逐漸加增以致敗產傾家者所在多有甚至構訟經年拖累實堪憫惻余屢思裁革祇以事體重大未敢率易紛更茲據闔邑紳耆等公請裁革津幫按保歸併里甲以便稽查而歸簡易並開章程數則詳加披閱於民有益於公無損洵屬兩全之道急應舉行即自今年上忙起按八十一保均分二十八里務各近在一處每里分爲十甲每甲舉甲長一人開徵後里總惟甲長甲長催門頭門頭催花戶一氣聯絡不日即可周徧花戶亦無遺漏所有津幫永遠裁革絲毫不以累民至里總書手向有費用不能全裁者於極力撙節之中爲量加體卹之意每封正銀一兩帶交經費一百三十文此外並無分文浮費經此整頓之後里書費用民間概免科派疲玩花戶本村亦易稽查爾百姓積害既除自當仰體國課爲重之意踴躍封納勿蹈抗延故習致干查究實爲幸甚所有公議條約一併勒石永遠遵行可也

沈士鏞傳

沈士鏞直隸天津人也庚辰翰林清光緒十一年知襄垣清介自持勤政愛民凡五任任各三年光緒二十五年始升平遙縣以去去之時老幼皆擁途送之其在襄垣也凡病民之政務必掃除而廓清之胥吏之害天下滔滔襄垣亦然公初蒞任即禁胥吏舞弊敢索民一錢者即處以極刑涉訟者多得其平民咸

悅服衙署內外弊絕風清者十五載次胥吏之害者爲差徭廐亭鎮爲南北通衢欽差省吏之往來兵隊囚徒之調遣皆需牲畜以迎送向徵於養牲家胥吏輒上下其手民甚病之公定全邑八十保輪流支給嚴禁胥吏舞弊民大稱便有碑詳其辦法噫有清末季賄賂通行朝堂鉅老封疆大員往往視爲故常沈公來自田間獨能憂民之憂不爲惡濁空氣所驅使者誠不多覯也

沈公稟准辦理差徭原文云敬稟者竊^卑職前蒙憲臺奉憲局清源局憲轉蒙憲臺撫憲扎開以晉省設立清徭局爲濟公協民起見查卑縣舊章支應學憲等大差及大隊兵差過境係與接到傳單後先期傳集闔邑八十保畜戶各趕驟馬到站造冊點驗先挑腴壯者支差分別大差送隣封沁屯二處者各給價二百文兵差各給價四百文若越站到權店交替者皆加倍發價所挑乘疲瘦牲口大差每頭出幫費錢三百文兵差每頭出幫費錢五百文若往傳出外不到者大差出幫費錢六百文兵差出幫費錢一千文所幫之錢悉交縣作支辦差牲價並一應費用歷年已久嗣於光緒九年正月^卑前縣李令汝霖奉升任撫憲張扎飭清查差徭經李令開具清摺稟覆四年九月十一日奉升任撫憲張批以李令所稟此項幫費即是折價別名批飭以後只許核實傳用驟馬不准再取畜戶幫費並列入定章出示裁免^卑職到任後於十二年八月間學憲將按考澤潞當即調閱案卷查悉前情即遵升陞撫憲張批示出示裁革幫費自奉到傳單後親自核明應支馬驟數目仍預期稟傳到站照章發價實裝實用計兩次均各傳驟馬一百二十頭以付支差其餘未傳之保分留爲下

襄

垣 縣 志

卷之三 名宦傳

十一

次遇差接續挨傳週而復始計支差一次只傳二十保驟馬每一保只出六頭並於票上註明如往傳先明外出者由該保正等墊錢代雇應差每頭定價一千文不准增減以杜爭端所有辦差酒席雜用等項亦悉由縣捐廉備辦絲毫不派累商民以後歷年學憲等各大差過境仍皆照此辦理並前歲倭韓事起潞澤兩屬練軍奉調過廐亦照實需數目傳用驟馬由縣發價計自改辦至今已十餘載該牲戶等亦頗具有天良每遇此等大差至境無不聞傳即到踴躍爭先洵於公務民情兩裨益惟前據紳民面稟欲^卑稟明憲台立案以垂永久^卑尙未具稟茲奉扎飭令認真考核自應一併稟請批飭下縣勒石立案永爲定章而垂永遠實爲德便除分逕稟撫憲局憲及本府外肅此奉請勛安伏祈垂鑒

沈公撰闔邑八十保輪流支差碑記云縣之廐亭驛爲南北通衢撫憲巡行學憲按臨皆經其地向來支備驟馬先期稟傳闔境驟馬其有羸瘠及外出者輸錢於縣有差民甚苦之余下車之次年學憲按臨潞澤有期矣書吏持票請鈐印悉傳之余謂差需有定數安用多備吏以舊例對且曰不如是恐遺悞及檢卷則此項陋例乃曾奉升任撫憲張公批飭裁革者也余遂依傳單實用數目傳備發給僱價並禁書差需索事畢民以爲便於是紳民請稟求大憲批示立案並刊石垂久余謂此事早經大憲批飭且後之君子爲民除弊其用心當遠過於余何用刊石爲至客歲紳民復以爲言會大憲有整頓差徭之檄余因而陳之得請後紳民將勒諸石請一言附其末因爲誌其大略云

劉煥衢傳

劉煥衢江西奉新人以捐輸得知縣清光緒三十三年來宰斯邑朝廷令停科舉設學堂公雖未嘗樸學喜與紳士交凡開通民智伸張民權諸建設無不言聽計從宣統間創設高等小校一所初等小學二十五所女學堂一所師範傳習所巡警教練所各一處省視學查察學務稱爲上黨第一如勸學所教育會自治講習所自治事務所亦公手所創設又捐廉五百緡爲高等學堂購添學舍更可見其熱心矣夫古人有八下會試自視高貴而失節者劉公卑以自牧耑聽耆紳言作國家根本大事業其識見爲如何世有學通中外飽食終日者亦有匹夫責擅作威福者聞公之風皆可自省已

邑人王煥文記其酒行減稅云爲國民者有納稅義務法理也菸酒茶糖銷耗之品以徵爲禁稅額特重亦近世文明各國通例也襄垣酒稅舊定十九萬觔徵制錢十六計三千四百串加之以錢易銀每兩解庫按一千三百折合邇來銀價日昂虧賠之數約九百串左右綜兩項計之常年直在四千串以上稅欸之鉅久已不支歲已酉合境酒戶困於輸將盡行歇業合詞稟請邑侯劉公請爲裁減公痛斯民之如傷迫催科之無着據以聞於藩憲一再稟始得減四萬觔易銀時准照切實市價報解通盤合算年約省一千七八百串重而輕滯而通非公之力不及此事既蕙公進酒商於庭而告之曰當此庫欸支絀財政清理應徵各稅有增無減吾所以爲此者非見好也誠以官一日即盡一日責足民亦足國也酒商聆之舞忭而喜退而請於余立石以揚休余親炙於公已久經濟文

章微窺端倪重以酒行諸公之請不敢以不文辭爰記顛末以垂不朽俾知公之再造酒行非私惠也實公德也酒行之愛戴於公非避稅也實樂輸也不然酒行歇絕而襄中之利源咸受影響國家之正供陡爲截止其損失豈不重哉反是以思則益歎公之溥權利於我襄人者如泰山河海之高深矣奚止酒行而已哉公諱煥衢字頌臣江西南昌奉新人兩蒞襄善政纍纍不殫述茲其一也勒諸貞珉用風於執政者

名賢傳

名賢傳者紀一邑之人物也襄垣自豫讓留侯而後流風餘韻猶有存者若連御史之直節劉文安之勳名郝太僕之正聲姚參政之宦績明弘治嘉靖時稱極盛焉迄今已數百年邑人述之猶若有餘芬焉則人傑地靈之說也舊故有人物志今則號爲名賢傳名異而實同詎不足爲一邑重哉

周

羊舌赤傳

羊舌赤字伯華職之子食采鞞鞞故號鞞鞞伯華左傳魯襄公三年羊舌職卒悼公問可代者祁奚對曰赤可遂代父秩佐中軍尉家語孔子閒居喟然嘆曰嚮使鞞鞞伯華無死則天下其有定矣子路曰由願聞其人也子其幼也敏而好學其壯也有勇而不屈其老也有道而能下人有此三者以定天下也何難乎哉大戴禮云孔子曰邦家有道其言足以興邦家無道其默足以容蓋鞞鞞伯華之行也

羊舌肸傳

羊舌肸字叔向職之子左傳魯襄公十六年晉平公即位羊舌肸爲傳二十一年范宣子逐欒盈殺其黨羊舌虎等十人囚伯華叔向樂王鮒見叔向曰吾爲子請叔向弗應出不拜其人皆咎叔向叔向曰必祁大夫室老聞之曰樂王鮒言於君無不行求赦吾子吾子不許其大夫所不能也而曰必由之何也叔向

襄垣縣志

卷之三 名賢傳

十四

曰樂王鮒從君者也何能行祁大夫外舉不棄讐內舉不失親其獨遺我乎詩曰有覺德行四國順之夫子覺者也晉侯問叔向之罪於樂王鮒對曰不棄其親其有焉於是祁奚老矣聞之乘驛而見宣子曰詩曰惠我無疆子孫保之書曰聖有謨訓明徵定保夫謀而鮮過惠訓不倦者叔向有焉社稷之固也猶將十世宥之以勸能者今懿不免其身以棄社稷不亦惑乎若之何其以虎也棄社稷宣子說與之乘以言諸公而免之不見叔向而歸叔向亦不告免而朝

戰國

豫讓傳

豫讓按史記讓事智伯趙襄子合韓魏滅智氏讓漆身爲癩吞炭爲啞爲智伯報仇欲刺襄子伺襄子出伏橋下襄子至橋馬驚索之獲讓讓請衣三繫伏劍自刎入賢鄉祠

史記傳豫讓云豫讓者晉人也故嘗事范中行氏而無所知名去而事智伯智伯尊寵之及智伯伐趙襄子趙襄子與韓魏合謀滅智伯而三分其地趙襄子最怨智伯漆其頭以爲飲器豫讓遁山中曰嗟呼士爲知己者死女爲悅己者容今智伯知我我必爲報仇而死以報智伯則吾魂魄不愧矣乃變名姓爲刑人入宮塗廁中挾匕首欲以刺襄子襄子如廁心動執問塗廁之刑人則豫讓內持刀兵曰欲爲智伯報仇左右欲誅之襄子曰彼義人也吾謹避之耳且智伯亡無後而其臣欲爲報讐此天下之賢人也卒釋去之居頃之豫讓又漆身爲癩吞炭爲啞使形狀不可知乞於市其妻不

識也行見其友其友識之曰汝非豫讓耶曰我是也其友爲泣曰以子之才委質而臣事趙襄子襄子必近幸子近幸子乃爲所欲顧不易耶何以殘身苦形欲以求報襄子不亦難乎豫讓曰既已委質臣事人而求殺之是懷二心以事其居也且吾所爲者極難耳然所以爲此者將以愧天下後世之爲人臣懷二心以事其君者也既去頃之襄子當出豫讓伏於所當過之橋下襄子至橋馬驚襄子曰此必是豫讓也使人問之果豫讓也於是襄子乃數豫讓曰子不嘗事范仲行氏乎智伯盡滅之而不爲報讐而反委質臣於智伯智伯亦已死矣而子獨何以爲之報讐之深也豫讓曰臣事范仲行氏范仲行以衆人遇我我故衆人報之至於智伯國士遇我我故國士報之襄子喟然嘆而泣曰嗟乎豫子之爲智伯名旣成矣而寡人赦子亦已足矣子其自爲計寡人不復釋子使兵圍之豫讓曰臣聞明主不掩人之美而忠臣有死名之義前君已寬赦臣天下莫不稱君之賢今日之事臣固伏誅然願請君之衣而擊之焉以致報讐之意則雖死不恨非所敢望也敢布腹心於是襄子大義之乃使使持衣與豫讓豫讓拔劍三躍而擊之曰吾可以下報智伯矣遂拔劍自殺死之日趙國志士聞之皆爲涕泣

甘羅傳

甘羅者甘茂孫也年少多才出一奇計聲稱後世雖非篤行之君子然亦戰國之策士也方秦之強時天下尤趨謀詐哉

司馬子長爲之傳云甘羅者甘茂孫也茂旣死後甘羅年十二事秦相文信侯呂不韋秦始皇帝使剛成君蔡澤於燕三年而燕王喜使太子丹入質於秦秦使張唐往相燕欲與燕共伐趙以廣河間之地張唐謂文信侯曰臣嘗爲秦昭王伐趙趙怨臣曰得唐者與百里之地今之燕必經趙臣不可以行文信侯不快未有以強也甘羅曰君侯何不快之甚也文信侯曰吾今剛成君蔡澤事燕三年燕太子丹已入質矣吾自請張卿相燕而不肯行甘羅曰臣請行之文信侯叱曰去我身自請之而不肯汝焉能行之甘羅曰夫項囊生七歲爲孔子師今臣生十二歲於茲矣君其試臣何遽叱乎於是甘羅見張卿曰卿之功孰與武安君卿曰武安君南挫強楚北威燕趙戰勝攻取破城墮邑不知其數臣之功不如也甘羅曰應侯之用於秦也孰與文信侯專張卿曰應侯不如文信侯專甘羅曰卿明知其不如文信侯專與曰知之甘羅曰應侯欲攻趙武安君難之去咸陽七里立死於杜郵今文信侯自請卿相燕而不肯行臣不知卿所死處矣張唐曰請因孺子行令裝治行行有曰甘羅謂文信侯曰借臣車五乘請爲張唐先報趙文信君乃入言之始皇曰昔甘茂之孫甘羅年少耳然名家之子孫諸侯皆聞之今者張唐欲稱疾不肯行甘羅說而行之今願先報趙請許遣之始皇召見使甘羅於趙趙襄王郊迎甘羅甘羅說趙王曰王聞燕太子丹入質秦歟曰聞之曰聞張唐相燕歟曰聞之燕太子丹入秦者燕不欺秦也張唐相燕者秦不欺燕也燕秦不相欺者伐趙危矣燕秦不相欺無異故攻趙而廣河間王不如齎臣五城以廣河間請歸燕太子與強趙攻弱燕趙王立自

割五城以廣河間秦歸燕太子趙攻燕得上谷三十城令秦有十一甘羅還秦乃封甘羅以爲上卿復以始甘茂田宅賜之

漢

張良傳

張良按史記及西漢書皆稱良韓國人查一統志良生城南城甫卽襄垣也屬潁川郡皆韓地襄垣古韓州良父祖以上五世相韓及秦滅韓良欲報仇不惜萬金之資覓爲博浪之謀誤中副車遂遊下邳遇黃石公授太公兵法後沛公起豐沛良聚少年百餘人從之誅秦滅項卒成漢業事詳留侯世家

史記留侯世家云留侯張良者其先韓人也大父開地相韓昭侯宣惠王襄哀王父平相釐王悼惠王悼惠王二十三年平卒卒二十歲秦滅韓良年少未宦事韓韓破良家僅三百人弟死不葬悉以家財求刺客秦王爲韓報讐以大父父五世相韓故良嘗學禮淮陽東見倉海君得力士爲鐵椎重百二十觔秦皇帝東遊良與客狙擊秦皇帝博浪沙中誤中副車秦皇帝大怒大索天下求賊甚急爲張良故也良乃更名姓亡匿下邳良嘗閒從容步遊下邳圯上有一老父衣褐至良所直墮其履圯下故謂良曰孺子下取履良愕然欲毆之爲其老強忍下取履父曰履我良業爲取履因長跪履之父以足受笑而去良殊大驚隨目之父去里所復還曰孺子可教矣後五日平明與我會此良因怪之跪曰諾五日平明良往父已先在怒曰與老人期後何也去曰後五日早會五日鷄鳴良往父

襄

垣縣志

卷之三 名賢傳

十六

又先在復怒曰後何也去曰後五日復早來五日良夜未半往有頃父亦來喜曰當如是出一編書曰讀此則爲王者師矣後十年興十三年孺子見我濟北穀城山下黃石卽我矣遂去無他言不復見旦日視其書乃太公兵法也良因異之嘗習誦讀之居下邳爲任俠項伯嘗殺人從良匿後十年陳涉等起兵良亦聚少年百餘人景駒自立爲楚假王在留良欲往隨之道遇沛公沛公將數千人略地下邳西遂屬焉沛公拜良爲廐將良數以太公兵法說沛公沛公善之常用其策良爲他人言皆不省良曰沛公殆天授故遂從之不去見景駒及沛公之薛見項梁項梁立楚懷王良乃說項梁曰君已立楚後而韓諸公子橫陽君成賢可立爲王益樹黨項梁使良求韓成立以爲韓王以良爲韓申徒與韓王將千餘人西略韓地得數城秦輒復取之往來爲游兵潁川沛公之從雒陽南出轅轅良引兵從沛公下韓十餘城擊破楊熊軍沛公乃令韓王成留守陽翟與良俱南攻下宛西入武關沛公欲以兵二萬人擊秦嶢下軍良說曰秦兵尙強未可輕臣聞其將屠者子賈豎易動以利願沛公且留壁使人先行爲五萬人具食益爲張旗幟諸山上爲疑兵令酈食其持重寶啗秦將秦將果畔欲連和俱西襲咸陽沛公欲聽之良曰此獨其將欲叛耳恐士卒不從不從必危不如因其解擊之沛公乃引兵擊秦軍大破之遂北至藍田再戰秦兵竟敗遂至咸陽秦王子嬰降沛公沛公入秦宮宮室帷帳狗馬重寶婦女以千數意欲留居之樊噲諫沛公出舍沛公不聽良曰夫秦爲無道故沛公得至此夫爲天下除殘賊宜縞素爲資今始入秦卽安其樂此所謂助桀爲虐且忠言逆耳

利于行毒藥苦口利于病願沛公聽樊噲言沛公乃還軍霸上項羽至鴻門下欲擊沛公項伯乃夜馳入沛公軍私見張良欲與俱去良曰臣爲韓王送沛公今事有急亡去不義乃具以語沛公沛公大驚曰爲將奈何良曰沛公誠欲倍項羽耶沛公曰鱖生教我距關無內諸侯秦地可盡王故聽之良曰沛公自度能却項羽乎沛公默然良久曰固不能也今爲奈何良乃固要項伯見沛公沛公與飲爲壽結實婚令項伯具言沛公不敢倍項羽所以距關者備他盜也及見項羽後解語在項羽事

中漢元年正月沛公爲漢王王巴蜀漢王賜良金百鎰珠二斗良具以獻項伯漢王亦因令張良厚遺項伯使請漢中地項王乃許之遂得漢中地漢王之國良送至褒中遣良歸韓良因說漢王曰王何不燒絕棧道示天下無還心以固項王意乃使良還行燒絕棧道良至韓韓王成以良從漢王故項王不遣成之國從與俱東良說項王曰漢王燒絕棧道無還心矣乃以齊王田榮反書告項王項王以此無西憂漢心而發兵北擊齊項王竟不肯遣韓王乃以爲侯又殺之彭城良亡間行歸漢王漢王亦已還定三秦矣復以良爲成信侯從東擊楚至彭城漢敗而還至下邑漢王下馬踞鞍而問曰吾欲捐關以東等棄之誰可與共功者良進曰九江王黥布楚梟將與項王有郟彭越與齊王田榮反梁地此兩人可急使而歸漢王之將獨韓信可屬大事當一面卽欲捐之捐之此三人則楚可破也漢王乃遣隨何說九江王布而使人連彭越及魏王豹反使韓信將兵擊之因舉燕代齊趙然卒破楚者此三人力也張良多病未嘗特將也常爲畫策臣時時從漢王漢三年項羽急圍漢王榮

陽漢王恐憂與酈食其謀撓楚權食其曰昔湯伐桀封其後於杞武王伐紂封其後於宋今秦失德棄義侵伐諸侯社稷滅六國之後使無立柱之地陛下誠能復立六國後世畢已受印此其君臣百姓必皆戴陛下之德莫不嚮風慕義願爲臣妾德義已行陛下南鄉稱霸楚必欲斂衽而朝漢王曰善趣刻印先生因行佩之矣食其未行張良從外來謁漢王方食曰子房前客有爲我計撓楚權者具以酈生語告於子房曰何如良曰誰爲陛下畫此計者陛下事去矣漢王曰何哉張良曰臣請藉前箸爲大王籌之曰昔者湯伐桀而封其後於杞者度能制桀之死命也今陛下能制項籍之死命乎曰未能也其不可一也武王伐紂封其後於宋者度能得紂之頭也今陛下能得項籍之頭乎曰未能也其不可二也武王入殷表商容之間釋箕子之拘封比干之墓今陛下能封聖人之墓表賢者之間式智者之門乎曰未能也其不可三也發鉅橋之粟散鹿臺之錢以賜貧窮今陛下能散府庫以賜貧窮乎曰未能也其不可四矣殷事已畢偃革爲軒倒置干戈覆以虎皮以示天下不復用兵今陛下能偃武行文不復用兵乎曰未能也其不可五矣休馬華山之陽示以無所爲今陛下能休馬無所用乎曰未能也其不可六矣放牛桃林之陰以示不復輸積今陛下能放牛不復輸積乎曰未能也其不可七矣且天下游士離其親戚棄墳墓去故舊從陛下游者徒欲日夜望咫尺之地今復六國立韓魏趙燕齊楚之後天下游士各歸事其主從其親戚反其故舊墳墓陛下與誰取天下乎其不可八矣且夫楚唯無強六國立者復撓而從之陛下焉得而臣之誠用客之謀陛下事去

矣漢王輟食吐哺罵曰豎儒幾敗而公事令人趣銷印漢四年韓信破齊而欲自立爲齊王漢王怒張良說漢王漢王使良授齊王信印語在淮陰事中其秋漢王追楚至陽夏南戰不利而壁固陵諸侯期不至良說漢王漢王用其計諸侯皆至語在項籍事中漢六年正月封功臣良未嘗有戰鬪功高帝曰運籌策帷帳中決勝千里外子房功也自擇齊三萬戶良曰始臣起下邳與上會留此天以臣授陛下陛下用臣計幸而時中臣願封留足矣不敢當三萬戶乃封張良爲留侯與蕭何等俱封六月上已封大功臣二十餘人其餘日夜爭功不決未得行封上在雒陽南宮從復道望見諸將往往相與坐沙中語上曰此何語留侯曰陛下不知乎此謀反耳上曰天下屬安定何故反乎留侯曰陛下起布衣以此屬取天下今陛下爲天子而所封皆蕭曹故人所親愛而所誅者皆生平所仇怨今軍吏計功以天下不足徧封此屬畏陛下不能盡封恐有見疑平生過失及誅故即相聚謀反耳上乃憂曰爲之奈何留侯曰上平生所憎羣臣所共知誰最甚者上曰雍齒與我故數嘗窘辱我我欲殺之爲其功多故不忍留侯曰今急先封雍齒以示羣臣羣臣見雍齒封則人人自堅矣於是上乃置酒封雍爲什方侯而急趣丞相御史定功行封羣臣罷酒皆喜曰雍齒尙爲侯我屬無患矣劉敬說高帝曰都關中上疑之左右大臣皆山東人多勸上都雒陽東有成皋西有殽黽倍河向伊雒其固亦足恃留侯曰雒陽雖有此固其中小不過數百里田地薄四面受敵此非用武之國也夫關中左殽函右隴蜀沃野千里南有巴蜀之饒北有湖苑之利阻三面而守獨以一面東制諸侯諸侯

安定河渭漕輓天下兩給京師諸侯有變順流而下足以委輸此所謂金城千里天府之國也劉敬說是也於是高帝即日駕西都關中留侯從入關留侯性多病卽道引不食穀杜門不出歲餘上欲廢太子立戚夫人子趙王如意大臣多諫爭未能得堅決者也呂后恐不知所爲人或謂呂后曰留侯善畫計策上信用之呂后乃使建成侯呂澤劫留侯曰君常爲上謀臣今上欲易太子君安得高枕而臥乎留侯曰始上數在困急之中幸用臣策今天下安定以愛欲易太子骨肉之間雖臣等百餘人何益呂澤強要曰爲我畫計留侯曰此難以口舌爭也願上有不能致者天下有四人四人者年老矣皆以爲上慢侮人故逃匿山中義不爲漢臣然上高此四人今公誠能無愛金玉璧帛令太子爲書卑辭安車因使辯士固請宜來來以爲客時時從入朝令上見之則必異而問之問之上知此四人賢則一助也於是呂后令呂澤使人奉太子書卑辭厚禮迎此四人四人至客建成侯所漢十一年黥布反上病欲使太子將往擊之四人相謂曰凡來者將以存太子太子將兵事危矣乃說建成侯曰太子將兵有功則位不益太子無功還則從此受禍矣且太子所與俱諸將皆嘗與上定天下梟將也今使太子將之此無異使羊將狼也皆不肯爲盡力其無功必矣臣聞母愛者子抱今戚夫人日夜侍御趙王如意常抱居前上曰終不使不肖子居愛子之上明乎其代太子位必矣君何不急請呂后承間爲上泣言黥布天下猛將也善用兵今諸將皆陛下故等夷乃令太子將此屬無異使羊將狼莫肯爲用且使布聞之則鼓行而西耳上雖病強載輜車臥而護之諸將不敢不盡

力上雖苦爲妻子自疆於是呂澤立夜見呂后呂后承間爲上泣涕而言如四人意上曰吾惟豎子固不足遣而公自行耳於是上自將兵而東羣臣居守皆送至灞上留侯病自強起至曲郵見上曰臣宜從病甚楚人剽疾願上無與楚人爭鋒因說上曰令大子爲將軍監關中兵上曰子房雖病疆臥而傳太子是時叔孫通爲太傅留侯行少傅事漢十二年前上從擊破布軍歸疾益甚愈欲易太子留侯諫不聽因病不視事叔孫太傅稱說引古今以死爭太子上佯許之猶欲易之及燕置酒太子侍四人從太子年皆八十有餘鬚眉皓白衣冠甚偉上怪之問曰彼何爲者四人前對各言名姓曰東園公用里先生綺季里夏黃公上乃大驚曰吾求公數歲公避逃我今公何自從吾兒游乎四人皆曰陛下輕士善罵臣等義不受辱故恐而亡匿竊聞太子爲人仁孝恭敬愛士天下莫不延頸欲爲太子死者故臣等來耳上曰煩公幸卒調護太子四人爲壽已畢趨去上目送之召戚夫人指示四人者曰我欲易之彼四人輔之羽翼已成難動矣呂后眞而主矣戚夫人泣上曰爲我楚舞吾爲若楚歌歌曰鴻鵠高飛一舉千里羽翮已就橫絕四海橫絕四海當可奈何雖有矰繳尙安所施歌數闋戚夫人噓唏流涕上起去罷酒竟不易太子者留侯本招此四人之力也留侯從上擊代出奇計馬邑下及立蕭何相國所與上從容言天下事甚衆非天下所以存亡故不著留侯乃稱曰家世相韓及韓滅不愛萬金之資爲韓報仇強秦天下振動今以三寸舌爲帝者師封萬戶位列侯此布衣之極於良足願棄人間事欲從赤松子游耳乃學辟穀道引輕身會高帝崩呂后德留侯乃彊食

襄

垣縣志

卷之三 名賢傳

十九

之曰人生一世間如白駒過隙何至自苦如此乎留侯不得已強聽而食後八年卒謚爲文成侯子不疑代侯子房始所見下邳圯上老父與太公書者後十三年從高帝過濟北果見穀城山下黃石取而葆祠之留侯死并葬黃石塚每上塚伏臘祠黃石留侯不疑考文帝五年坐不敬國除太史公曰學者多言無鬼神然言有物至於留侯所見老父予書亦可怪矣高祖離困者數矣而留常有功力焉豈可謂非天乎上曰夫運籌策帷帳之中決勝千里外吾不如子房余以爲其人計魁梧奇偉至見其圖狀貌如婦人好女蓋孔子曰以貌取人失之子羽留侯亦云

晉

李燾傳

李燾字秀和鞞鞞人父佐漢大鴻臚燾少有高行博學研精與北海管寧以賢良徵不行累辟三府不就司馬懿爲太傅辟燾爲太傅屬固辭郡縣扶輿上道時燾母疾篤乃竊踰泫氏城而徒還遂遭母喪論者嘉其志節後爲并州別駕司馬師輔政命燾爲大將軍從事中郎燾到引見師謂燾曰昔先君辟君而君不應今孤命君而君至何也對曰先公以禮見待燾得以禮進退明公以法見繩燾畏法而至師甚重之累遷御史中丞當官正色不憚強禦百僚震肅尋遷大司馬泰始初封祁侯遷尙書僕射拜特進光祿大夫及卒追贈太保謚曰成

唐

郝讓傳

郝讓博學宏才初授饒安令遷兗州屢進不以爲榮屢退不以爲辱高曠自得蓋有道之士也

楊潤傳

楊潤字君澤勇力過人少負大志金末元南下首破勁敵拜懷遠將軍同知沁南節度行鞞令悉力攻擊敵不能逞乃遣客刺之猶搏殺數人乃殞

元

李新傳

李新段堡里人宋熙寧間尙書名勅本縣壽聖寺碑陰功業無考

楊仁風傳

楊仁風幼聰敏能文登進士授刑部郎中歷管遼陽省參知政事以中書佐丞致士入鄉賢祠

張碧傳

張碧至元間鄉舉授忻州同知高才絕學以文章名世入鄉賢祠

連肇傳

連肇至元間進士歷潞城陵川汾州教官爲阿都溫太尉府參軍及山東道考試貢舉官沒贈集賢院學士文章著名入鄉賢祠

襄垣縣志

卷之三 名賢傳

二十

李執中傳

李執中登進士至順間累立豐功官至禮部尙書

明

連楹傳

連楹字子聰肇之孫幼孤奉寡母訓讀書山中日炊米一杓刻勵進修明初舉於鄉授官轉春坊改御史糾彈無所避因專其任歷六七考不調靖難兵起與同列董鏞相誓糾察大小臣工有懷二心者露章彈之金川門陷叩馬欲刺成祖被殺屍植立不仆察之乃仆入鄉賢祠

邑人某傳云連楹者肇之次孫也字子聰別號棟宇登洪武壬子科由國學生初官承勅郎陞翰林院左春坊選太子贊讀博極經史啟沃良多時轉福建道御史楹賦性孤介剛方不避險難太祖嘉其忠愍克堪委任令巡五城二次操江巡倉十有餘載共任御史職二十有三年太祖晏駕建文維登大寶文皇姚廣孝策起靖難兵於北平乘勝長驅直抵南都公與御史董鏞戮力同心誓死報國不効忠於本朝者輒露章彈劾及金川門失守公與董鏞在文皇前仗義直言抗詞瀆諫曰以臣纂君可謂忠乎以叔殘侄可謂仁乎背先帝分封之制可謂孝乎名分法紀蕩然懼不可以訓天下後世當時詞色甚厲致文皇大怒卽命典刑當引頸受刃之際有白氣冲霄且面色如生骸骨立而不仆文皇遣官祭之迺仆奉勅合發迴建祠專祀當時公苗裔連鉅等懼赤族之誅各四散隱姓逃亡

本縣官歛衣冠葬之迨事寢恩赦後稍稍復業迨萬歷十一年奉都察院勘合內開廣東道御史屠叔方題忠臣已褒外親未宥懇聖恩推廣明詔大慰忠靈以培聖代綱常事要將革除間被罪諸臣遵奉先年詔書各於生長鄉邑建祠專祀卹錄墳墓苗裔仍量贈官錫謚各一節該禮部議得竊惟立國於天地以綱常爲先致身於朝廷以忠義爲本是以叩馬之賢獨異倒戈之衆漆身之士足愧二心之臣自古聖帝明王代天撫世莫不表揚大節蠲貸私讐者誠有見於風化之本也今按革除間死難諸臣或慷慨殺身或從容就義甚至刑及妻孥禍延族黨曾不一動其念此其盡忠所事有死無二直足以維世教植人紀矣委應遵奉先年詔旨及依御史屠叔方所奏建祠表墓錄裔易名以慰忠魂以激臣節但歷年已久紀載多遺忠義之褒表旣不可以濫加墓裔之有無又不可以遙度合侯命下行各省巡按御史備查要見某官某人生於某處或被罪或自隕墳墓苗裔有無見在其現在苗裔是否某人嫡派子孫見今有無衣冠各省會城鄉邑曾否見有祠宇一一查明具題以憑酌議施行時至萬歷十七年有六代嫡孫連教聞知恨苦難無申將情赴按察司署學道呂訴告批曰連鄉宦果當靖難死節此係忠臣例建祠歲祭本縣查實卽時抄給勘合准入鄉賢祠察院及守巡兩道委潞安府推官南皮愧亭李騰鵬查盤名宦鄉賢祠入幾位見得公冊內事跡感激激作文表並立碑記云後追贈詹事謚剛烈

上黨太守李騰鵬記其死節云雲霧昏瞶必有疾風迅雷以解散之而後天宇晴霽天造草昧必有

剪除誅戮以廓清之而後世道寧一語曰君義臣行忠各求其是而已襄垣爲古趙襄子屬豫讓報智伯氏地也載在史牒此固有耳目者所共知熟意千載而下繼美紹芳者尙有其人哉嗚呼當我文皇靖難之際一時抗節之臣雖忤文皇之意實契高帝之心最皎者若方周黃練其餘抱赤衷蹈白刃者尙多也今於襄垣而得一人焉其盛察御史連公平公楹字字聰別號棟宇古籍襄垣世居縣之陽澤村祖肇以麟經舉至元進士歷潞城汾州教官轉阿都太慰府參軍考試山東後贈集賢院學士其文章行業在縣志可考父基業公早逝母李氏教之學公敏於學日誦千言不輟凡所撰述揮毫立就性沈靜築屋於後河楊桃之谷讀書其中日炊米一杓爲常無間寒暑其刻厲每如此一日歸省其母母憫其苦殺鷄食之公問其故曰吾願兒之勉旃也公曰門祚薄兒恨不能奮翼雲霄以承先人之志慰母氏之懷敢不勉旃從此益奉勵舉洪武壬子科鄉薦由國子生授承務郎遷翰林院左春坊太子贊讀啓沃良多高皇帝以公性剛方堪彈劾之職特轉福建道監察御史巡城巡倉操江歷俸十有餘年每考績奏最上欲重用之因久其任迨文皇靖難兵起公與御史董鏞相誓以死報國察羣臣有携二者輒露章彈之羣寮肅然會金川門不守公在文皇前抗詞諫曰以臣篡君可謂忠乎以叔殘侄可謂仁乎背先帝分封之制可謂孝乎名分紀法蕩然懇不可以訓天下後世指天示日詞色不少屈文皇怒命左右殺之公從容引頸受刃有白氣冲於天尸僵立仆色如平生焉當時文皇於抗節諸臣多亦其族公血屬連鉅等懼誅各亡失後禁馳稍稍復業歛衣

冠而葬封而樹之矣嗚呼當時死事者忠於建文即忠於高皇帝也於文皇之靖難蓋並行不悖觀其語羣臣曰使練子寧若存吾當用之則文皇之心可知矣後皇恩浩蕩屢用言官言以褒崇足以昭天理民彝之不容泯公自是得從祀鄉賢焉余領郡符司理上黨行部至襄垣邑人姚大參九功詣余言及此事余未嘗不撫節嘆也公之裔孫連大綱連教持公之行狀謁余於公署謂公之行實已編入實錄公之墓不可不表章以慰忠魂於地下 鑑於將來願乞一言以垂諸箴銘余遂爲之記其履履如此復曰正大之義流行於天地間不擇地而生端人正士獨山右風氣剛勁固所鍾毓獨多即襄垣一小邑前有豫讓今復有公何前後照耀如是也豫讓常曰將以媿人臣之懷二心者今觀公之始末視豫讓真不愧哉

劉徵傳

劉徵字文獻號耕樂處士性介直有才辨善於誘掖涉獵書史且通星歷之學明太祖特詔徵隱逸與壺關杜敦同被寵命拜太子賓客辭不就益獨行誼躬耕樂道一邑尊禮之以壽卒於家翰林院修撰周貴作志銘給事中鄒冕序輓詩

李濬傳

李濬字大川永樂壬辰進士初授兵部主事歷郎中陞保定知府調河間陞都察院右都御史管理易州廠事清操善政所在有聲文章華瞻時人有河北小聖人之稱所著有雲谿瀛海二集入鄉賢祠

襄垣縣志

卷之三 名賢傳

二十一

劉端傳

劉端字守正號雲山永樂癸卯舉人性敏好學博極羣書初授密雲縣教諭尋改新安教諭後授寧州學正一時名士多出其門卒後贈廣東道監察御史入鄉賢祠

劉潔傳

劉潔字清之景泰庚午舉人任廣東道監察御史數上疏言事從徵荆襄間運籌決勝其功最著遷浙江副使老成持重洞達機宜雪獄救荒清監埋漕悉有條理尋卒於官贈南京吏部尚書入鄉賢祠

劉鳳儀傳

劉鳳儀字天瑞宏治庚戌進士初授高密知事興學校廣儲蓄弭盜賊撫逃亡旱蝗爲文自責蝗入海死陞戶部主事出納惟允轉陞刑部員外郎贈南京吏部尚書入鄉賢祠

劉龍傳

劉龍字舜卿號紫巖鳳儀長子宏治己未探花初授翰林院編修歷修撰中允學士經筵日講進諫以履盛約以持盈之說世宗嘉納兩典順天鄉試俱稱得人陞禮部侍郎帝欲以太后謁廟龍執祖訓不可凡三上竟報罷尋陞南京禮部尚書改吏部尚書考察京職去留允當調兵部尚書裁中貴人以法雖魏國永康撫寧亦鮮假借時宣大有警條上機宜六事歷尚書六年召還京屢疏乞休特允馳驛卒年七旬有八賜諭祭贈太子太保謚文安

劉夔傳

劉夔字舜弼號黃巖鳳儀次子正德庚午辛未聯雋選翰林院庶吉士改兵科給事中世廟入繼詔起太監蕭公敬疏謂非所以令天下不報京東民田爲權倖侵據悉斥還民改翰林檢討後出爲河南僉事以抗直謫大名通判葺元城書院進諸生商確經史擢南京都察院經歷歷戶部郎中出爲江西副使河南提學貴州學正所至聲績懋著轉山東按察使平反冤獄號明允晉左僉都御史巡撫保定緩賦驅蝗拯濟有法值邊警飭兵屯守要害軍政克舉三年以病乞歸又六年卒賜諭祭所著有黃巖集金陵稿恆陽集處州錄大名吟奏議七卷

郭秉聰傳

郭秉聰字子愚登嘉靖丙戌龔用卿榜授工部主事陞本部員外郎中以修九廟功成陞通政司右通政

郝良臣傳

郝良臣字廷蓋嘉靖辛丑進士授長垣知縣性剛直冰蘖自持通河渠增堡砦實義倉察奸詰暴境內大治會有詔徵取垣人立生祠冢宰王端溪爲記陞吏部驗封司主事遷文選司郎中擢太僕少卿調四夷館陞南京太僕寺卿改光祿寺卿出爲江西右布政使

賈天爵傳

賈天爵字子修嘉靖丁未進士初授行人司行人肅將王命出納有聲爲朝論所重陞兵部車駕司主事

襄垣縣志

卷之三 名賢傳

二十二

秉公持廉砥礪益甚如關文等諸所職掌不少假借兵政有裨尋陞職方司員外郎簡閱耆宿將領得人擢武選司郎中競銓流品請託不容視職方之政有加焉陞河南彰德府知府改登州府知府

姚九功傳

姚九功字惟叙嘉靖丁未進士初授許州知州操持廉慎政務嚴明吏畏民懷建有生祠陞刑部員外郎多所平反陞陝西僉事巡關西陞本省右參議奉勅撫治商洛陞本省副使奉勅兵備固原地方軍民繪像入督府遺範祠祀之陞本省右參政奉勅經理涼莊邊務所至興利除害省費節財理國事如家事焉

王俊臣傳

王俊臣字用章號明渠雲龍之父萬歷間歲貢任霍州訓導陞潘寧河王府教授因王不度棄職歸里性豪宕好施予贈文林郎束鹿縣知縣入鄉賢祠

王基洪傳

王基洪萬歷辛丑進士選翰林院庶吉士授監察御史出按陝西抗疏列稅璫罪狀得旨撤回再按浙江值水旱民飢疏請易折色並得賑銀十萬民賴以甦出爲應天督學校士稱公明

王雲龍傳

王雲龍號霖宇萬歷辛丑進士任臨朐縣知縣正直廉明愛民如子再任束鹿治河渠免水患陞吏部主事尋遷稽勳司郎中衡鑒平明有晉山濤風

王馴傳

王馴成化中以例貢任渭南縣丞果敢有才力渭南爲孔道達官往來如織其僕役恃勢凌轢馴抗言據律例折之

馮繼京傳

馮繼京字紹元萬歷時貢士任直隸河間府通判督密雲餉禦邊有功手著薊西邊政圖陞廣西河池州知州

趙銓傳

趙銓嘉靖時貢士天性孝友學問該博累官宣寧王府教授

郝臣傳

郝臣嘉靖時貢士任秦州學正性資豪宕字成一家所至課士科目多出其門儒林推重

趙可進傳

趙可進萬歷時貢士任文水訓導歷陞河南項城知事爲政簡而不擾愛民如子振興學校一時科目最盛民爲立生祠

李養超傳

李養超天啟時恩貢任長沙府通判剛正不阿多爲所平反士民立碑頌德

襄垣縣志

卷之三 名賢傳

二十四

劉大武傳

劉大武自許州判陞靈臺知縣負性明敏發奸摘伏人不敢欺破囉哩賊於橫渠羣盜屏息夜聞績紡讀書者晨卽賞勞課士勵俗著有循聲本郡志

清

張龍貴傳

張龍貴字雲峯果敢英敏幼學韜鈴康熙丙辰任湖廣副標千總在琵琶灘殺敗譚逆恢復隕西白河房山三縣己未隨四川制軍進剿巫山首先扒城擒渠帥徐有魁王鳳奇等並招撫夔州府等處獻俘百餘人已已聖駕出古北口隨輦面奏蒙賜扳指荷包陞江南東海營守備又進征喜峯口噶爾旦等竭力用命調補福建臺灣南路營守備授武德將軍帶領子侄千總張天相張天雄運糧於白牙烏喇地方給散有功遷浙江撫標中軍參將

崔鍾塘傳

崔鍾塘字三采性明敏工文詞登雍正癸卯進士任江西贛縣知縣甫視學卽以丕振文風爲己任月試諸生一時獲雋者衆丙午鄉試同考官所得俱名士致仕歸時值水雹黍苗盡傷公給鄉人籽種三十石

崔溍傳

崔溍字魯江雍正庚子舉人博學能文任江西德安知縣

崔淇傳

崔淇字子瞻雍正癸丑進士任伊陽知縣後調榮澤賑災恤民多有惠政

趙復元傳

趙復元字見心品詣醇正學問淵博中雍正己酉舉人任代州學政課士端嚴居官謹慎致仕歸紳士餞送五十餘里

趙默傳

趙默字存誠登乾隆辛未進士任陝西定邊知縣戢盜安民折獄果斷人咸服其明哲家居孝友於邑中學校事尤多修舉

趙振朝傳

趙振朝字麟閣由附貢任宣化府通判陞授盛京府通判府尹題奏為人誠實辦事無誤致仕歸經修文廟除捐資外復助米糧費用約數百餘金修城垣石橋等工經理尤善

德行

趙光啟庠生闔邑公舉德行巡按白旌其門曰士林推重

馮雲暉孝友性成事繼母甚敬撫孤侄猶子德望重於鄉閭文章華於藝苑學憲以才優德劭旌獎之

趙邦屏自幼好善出資捨藥建廟施地享年七十有八子占斗天津衛都司仰斗庠生

襄垣縣志

卷之三 名賢傳

二十五

姚欽明增生德孚鄉里文重士林舉鄉飲介實年八旬應朱文宗科試取列一等文宗喜曰爾真今之梁灝也賜匾曰敦品力學

李炳文吏員孝友克純義蹟素著自幼讀書佩孔孟之教慨然以孝弟為務功名之念淡如也戚族有不能婚葬者尤多倚賴

張廣益增生居家孝友立教有方丙子年李邑侯給匾士林矩矱

孔興舜廩生賦性純篤事繼母如生母教弟成名撫侄林立且矜孤恤寡敬老憐貧景學臺給匾曰孝友

克敦

耆德

趙惠 正卿陞之孫

郝慶 學正臣之父

王黨 教官宗尹宗稷之父

趙景綉

韓軌

姚珊

李雲鵬 舉人迎時之祖

王祝 李林

趙景綽

郝雷

趙錫 舉人津之父

楊渭川

趙希先 恩榮壽官舉人大紀之父

郭衛京

德厚行方誼敦古處享壽九十有餘李邑侯以齒德兼優獎之

王亮

乾隆十一年恭逢聖駕西巡赴台接駕獲觀天顏賚以白金一錠太守旌匾曰帝賚耆年

孫文元

繼曾父孝慈兼盡訓子成名且仗義息爭鄉人敬重年八十卒

王 擴
崔仲和

補遺

李占先傳

邑人
邢廷輔記

李老先生諱占先世居太平村附屬南坡村前清邑庠生精通醫道濟人無數家非殷實不計脉金寡言語絕爭競待人寬厚處世和平享壽七十生子四人一生之好惟善是從行誼高尚舉世可風民國十五年善終於鄉鄉人永思不忘云

襄垣縣志

卷之三 名賢傳

二十六

文儒傳

文儒傳者所以存其人之梗概凡例謂理學文苑皆入此類精研書畫之士擇尤附見夫學行繼程朱文章介韓歐皆曠世而罕遇者况一縣之域又不可多得之數乎若書畫雖為藝事而能致其精則趙董兩文敏江南之三王庶幾近之甚矣文儒之難也舊志無文儒傳歷代人物又未多見其著書立說傳於後世間有於理學文苑之外集其奏議詩詞已詳於著述鄉賢各冊內茲無再述之必要謹就其耳聞目擊能詳其事實者傳焉

清

李青綺傳

李青綺字錦章生有至性甫成童即以家貧親老為憂惟專志奮讀以冀一博歡顏年十九入泮旋食餼訓蒙於太谷聞杜大賓為谷邑名孝廉往師事焉凡師有改授罔不潛心受教久之大賓謂青綺一日千里洵不羈才因備授以名家時文古文併經解試帖要法青綺於訓蒙餘暇肆志斯道厥後由選拔登賢書得於杜之力居多嗣後從學日衆青綺必先品行後文藝為準繩一時遂多知名士越十數年司訓長平仍以教谷人者教澤人士風為之丕振若王樹棠李潔王繼先諸孝廉皆出其門當任高平時有東學田溥未及期年卒於署其家人糊口無從青綺捐俸為之倡並勸同人共得二百餘金俾一家孤寡得以完歸青綺年將七旬遵禮告歸未嘗輕至公門而邑中公務又莫不應命若多令修考院卓令創建漳川書院皆委之督辦他如捐起登雲會等事有公必先無役不至此一邑所共鑒者至若先生胸懷落落全無芥蒂與人故優游林下二十年間每以讀書寫字為事暇則與胞弟青房兼族老數人暢談讌會見親族里黨諸少年必殷殷以孝弟忠信端品力學相勸勉蓋其至性然也咸豐辛酉青綺年九十縣令孫稼亭親至存問並贈以果稱人瑞四字匾額此其高足弟子趙青雲原傳之大意云爾

連士毅傳

連士毅字致遠號靜菴世居陽澤河村明監察御史楹十六世嫡孫也家貧嗜學幼從族祖躋堂讀過目成誦日記萬言漸通經史好橫渠之學講解最力弱冠入膠庠食廩餼中咸豐辛亥恩科第十二名舉人時同考試官本房房師楊公總批其卷云敲金戛玉之聲抽繭剝蕉之理含英擲秀摛辭則筆下生花按部就班製局則胸中有竹詩才濃麗韻語清新經藝精深博大擬董子之溫醇策對剴切詳明擅賈生之淵茂是能龍鼎獨扛鳳樓特造者也揭曉來謁知生姿才俊逸家世清芬綺歲掇芹各馳鬣序英年食餼幟樹騷壇際此秋闈角藝喜分桂苑之香行看春榜蜚聲榮摘杏林之豔副予厚望勵爾前修觀此數語可以知其學博矣後截取知縣以家貧親老未出仕居恒廉潔自持正誼明道不謀利不計功有古儒士風邑令孫福清李汝霖時召與講學最器重之光緒丁丑歲大禋公首倡義舉着邑人孟崇旺等東出磁州買粟數百石分濟鄉黨所活者衆又請縣令稟准上憲開放常平倉及各村之社倉等以普濟襄民其

學行之顯著者如此晚年受邑令李聘與孝廉趙廷芝等續修邑乘採擇精詳著述富麗充足爲後之執筆者法公生於嘉慶丁丑十二月卒於光緒壬午五月壽六十有六鄉人仰其行儀共捐貲豎其神道碑於村之東以誌不忘云

苗雨田傳

苗雨田字潤之邑之名士也幼聰穎好學有大志不拘拘於章句每談天下事輒有奇驗早列膠庠食廩餼每試冠同輩學政錢公批其文曰清真雅正著有文萃集多卷因貧未付梓設館授徒不計修脯英俊者多出其門下孝廉連篤敬廩貢生王煥文爲雨田高足提倡新學裨益地方其慮事之精詳持身之高潔皆傳雨田心法雨田又善活人術好傳山女科因崇青主爲人遂取其精神所著者以救世求無不應藥無不效未嘗索一錢貧者且助以資嘗曰醫乃仁術也吾爲救世而學此何賄爲賄則污聖人之道我不能爲良相以醫國今學良醫以醫人是吾之責亦吾之所樂爲也子二次淳然能讀父書振家聲智慧出人上鄉人無賢不肖皆謂雨田有子矣古聖人謂積善降祥不其然歟夫人以正直精神純粹學術遺傳子孫表示社會俾門下弟子有軌可尋衣鉢相傳皆爲社會佛古鄉先生沒而可祀於社者其非斯人耶

民國十三年三月 大總統題褒老成典型四字匾額並褒詞一幅如次

大總統褒曰孔門德行之科允矣首選魯國靈光之殿歸然獨尊文獻足徵流風未沒兼而能之不可及

襄垣縣志

卷之三 文儒傳

二十八

也爾山西襄垣已故苗雨田者生有至性人無間言黃枕九齡久已抗聲乎江夏綠衣五色昱然媲美乎老萊龐士元望重南州韓昌黎文光北斗門題通德弟子折乎康成社有耆英婦孺背誦乎君實於戲兩字名孝敬之里地以人傳十室有忠信之師善由我擇作之坊表光乃門望

趙海清傳

趙海清字文甫號鏡寰清貢生邑之北關人也性仁孝好學讀書輒數行俱下幼承庭訓攻經史過目不忘弱冠爲諸生冠復食廩餼後以明經選歲貢時人稱飽學多勸設帳五龍廟海清許之講學授徒主陽明知行合一之說學風廣被桃李滿門牆因家貧藉修脯供事蓄並懸保艾春長匾以報之素不妄費一錢惟有書癖見新書則購讀邑令沈士鏞雅愛之曾親書一聯贈之云素位且行今日事得閒還讀古人書歲戊戌西學初來士大夫多有夷變夏之懼海清獨謂科學有實用取算學天文博物等科研求之又手植桑八百株實行試驗爲鄉人倡應歲試督學寶熙給以高小校教員文憑繼充本城高小學堂教授應邑令劉煥衢之聘也甫二年覺精神不繼又不欲敷衍誤公事退鄉間復理蒙學業藉資修養嗣後邑侯如李霞軒邑紳如李芬浦等再三請先生主講高等小學海清均婉却之民國八年卒於家年五十三易箒時留詩數韻悲歌感懷有知命樂天之概一生服務教育界幾四十載鄉先生有子弟者多令從其游亦可以想見其爲人已

附門徒孫嘉政等與趙老夫子所豎之德教碑記

楊膺榮

公孝友性成玉如師之長子承甫祿甫之胞兄山西育才館畢業前充潞鄉汾蒲等縣村範委員篤生懋德之父也居城東廂坊天資穎異少務農暇不釋卷父設私塾見其學勤令執爨而伴讀下筆成文府首入泮父教兼醫公善奉養繼志述事人稱少先生未幾考冠壹等食餼元卷學憲嘉獎四方聞風來學益衆父歿後教承甫治家祿甫成名凡一言一行益加敬慎其講解筆削對於弟子因材施教必明白曉暢不稍含糊隻字每院考桃李多出公門其循循善誘乃爾清末改革算術地理中教所缺而公一見了然畫式繪圖指掌熟悉爾時風氣不開劉公創辦高等小學堂人皆裹足不前聘公爲堂董而兼教務及門皆從是故全班學生十居八九不問而知爲文甫弟子惜當時數薦未中游洋未遂洎民國初年省長閻特晉正紳門人等散處四方至今政界有人軍界有人而紳界商界工界無不有人現民軍營營長孫君嘉政日本大學法學士孫君嘉惠弟兄發起頌公德教而四方響應皆心悅而誠服遂勒石以誌噫緬懷山斗尤難忘其節操焉無事不入公門清也設館不計脩金廉也終身不染俗務潔也有此三德行端表正百世下猶將聞風興起矣而況於親炙之者乎何敢湮沒不彰也昔翰林沈公知襄十有五年不輕嘉許於人卸篆贈公聯曰素位且行今日事得閒還讀古人書觀此可知公之爲人矣膺榮與公同硯知之深故能言之切不敢過情爰直記之云爾

王煥文傳

王煥文字有章東門外小壩村人清貢生幼承家學精左氏童子時名卽藉藉入泮後又研經史食廩餼襄垣縣志 卷之三 文儒傳 二十九

試輒冠儕輩講學數載桃李滿門如王縉雲王鍾雲王培文張聚文皆其高足也歲甲辰考入山西大學堂西學專齋肄業復考入優級師範學堂名列全省第二人因鬧舉子業未屆滿而罷旋應屯留聘充高小教員時縣立師範傳習所公請返旆主持之其後歷充教育會會長高等學堂堂長教員成績卓著襄中公益亦多所贊助年四十四歲卒無子夫人能以高潔精神傳諸不朽則軀壳雖化精神常在死而猶未死也先生雖抱伯道之嗟則斯文未喪大道猶傳亦足以自豪已

郝允中傳

郝允中邑西關人執如其字也清廩生精書善畫性豪邁不事家人產業弱冠入邑庠卽隻身走豫鄂工書善畫不須假資斧也棲隱武昌黃鶴樓畔臨江自負大有投鞭斷流之概惜前清重制藝允中酷嗜經史子集故不得志於文場洎晚清末葉改策論則稍稍售焉生平講友愛慎取舍常屆歲除而不能舉炊然絕不啓口向親友告貸邑房吏李某允中摯友也常厚贈之心感而口不敢言謝其怛落有如此者生死患難置之度外清癸卯陝西舉行秦晉併科允中赴試程抵風嶺渡擇舟急駛抵中流浪大作漂沒百餘里全船人聲鼎沸神色泰然足見涵養功深也

米鑑傳

米鑑字子衡清廩生邑之郭莊村人也賦性耿介學識優長童年時文名卽著遊泮後屢試冠軍曾入太原晉陽書院肄業記性特長余在髫齡時嘗聞先大人言米先生讀書過目不忘能於貼堂文卷中擇其

精者記十數篇返舍膳錄後因家貧返里舌耕度日苦讀教子子二長登鰲次登航皆能以文名世弟子之採芹食餼者不勝枚舉門人恭送化雨春風匾額以頌德教嗟夫士爲四民之首一言一動關乎風化鑑能品行端方學問淵博雖家貧絕仕進而設帳授徒義方教子以致桃李滿門克昌厥後其願不虛已

米登航傳

米登航字普齋清恩貢幼承家學弱冠知名博學能文時人推爲首屈有范文正爲秀才時之抱負惟天性孝友淡於利祿因胞兄登鰲棄世遽爾灰心設帳家園循然善誘襄潞兩縣學子多遊其門下參議院書記米正鵠政治實際員段廣潤潞安中校教員段樸皆先生高足也門人恭送匾額曰仰沾化雨課讀之外復精岐黃凡經診治無不神效惜天不永壽竟遇強仕而終噫死生有命富貴在天古聖已常言之矣先生守分安命已得孔門心法而講學教人不慕榮利獎進名節亦高人一等等也

王儒鈺傳

王儒鈺字子相郭莊村人清增貢生才學優良品行端正善楷學歐酷似曾在縣城南關等處設教多年門徒成名者甚衆如郝映衡李松齡趙壽生屯留徐升堂等皆知名士又精岐黃術醫人無不效亦不伐已功亦不受贈與對社會排難解紛不避怨提倡村中創立學堂以開風氣溯自歐風東漸以來無識者多排擊之儒鈺能不泥古而通今亦可謂識時務者已

李如寶傳

李如寶字國珍清優廩生品端行直學邃功深因家道少絀停試秋闈設館訓徒培植多材出其門者優廩增附不下數十人同治丁卯冬捻匪擾亂逼近潞境奉令團練鄉勇以資防衛獎給軍六品銜食餼頗早應出庚辰歲貢前因光緒三四年邑遭大侵襄辦賑務尤爲出力蒙給歸部卽用訓導出學受獎熱心試用奈後染病身衰有志未遂時人惜之

張永清傳

張永清字漣漪清廩生學識優良品行端正設教閭里教育慇懃從學甚多成就亦衆門人敬贈匾額曰仰霑化雨

趙希曾傳

趙希曾字省三清光緒丁酉拔貢長於詩賦時藝亦精文明噪一時咸稱爲小才子

李啟鵬傳

李啟鵬清廩貢生學有本源才名藉甚歷任朔州學正嵐縣訓導善書法眞草俱佳

李枝茂清廩生學問深邃書法尤精城關社廟多留遺跡

路捷清歲貢才崇學博書法行世名勝之地多留筆跡

李若揆清附貢品端學篤善於行書

王錫聰清增生學問純粹書畫並佳

李錦清廩生學識宏遠更善行書

黃映庚清附生性敏好學楷書尤精

苗滋榮清廩生才高識卓寫畫兼工

民國

連儒奎傳

連儒奎邑之師範畢業生也世居南鄉常隆鎮少負才名力學不倦有清末葉童子試已冠其曹適更學制復肄業師範成績最優先後設學本邑莊頭村潞城北村弟子成名者甚衆邑人如宋國華梁炳瑩粟來麟皆知名之士居恒手寫經史集精華而錄之以便教人者不下二十冊述而不作亦孔門之徒也民國五年邑令陳士凱聘其創辦模範國民學校手訂章程改建校舍滲淡經營煞費苦心八年赴并垣求學入模範示教養成所研究教育以期改良教授不幸因勞致疾遂至不起惜哉

王鴻儒傳

王鴻儒字超文邑之大黃莊人世業耕讀有隱德父永清母張氏於清咸豐六年四月二十九日生鴻儒貌魁梧稟有至性兒時父即以經傳口授之日加一日故記憶真確終身未忘嘗講二南因悟齊家爲治國之本觸類旁通遂將修齊平治之道朗對不爽父大悅企望彌殷弱入邑庠旋以優等食廩餼而屢困秋闈竟因考滿負成均吏部註冊以訓導候詮非其志也平居設帳授徒從遊者衆每學使按臨新入學

襄垣縣志

卷之三 文儒傳

三十一

弟子多出其門爲學重實踐故事親孝與人忠又豪俠好義二十九歲喪父四十六歲喪母皆哀毀幾滅性遇忌日必泫然泣鄉鄰告貸無不立應戚之無力婚嫁者恒以一身任之婦女之守節而敦孝行必聞於有司請與旌揚他如創設小學遊行宣講種樹造林皆身爲之倡蓋學力之表見者也所爲詩文纏綿樸茂嘗有句云人間至樂誰如有八十慈闈日日欽可以想見其爲人矣邑人欽行誼以聞於上蒙

大總統題褒宗族稱孝匾額並予黃綠二色銀質褒章以民國十三年四月二日卒年六十九配趙氏王氏子培鑾孫育英能世其業且光大之君子謂爲隱德之報云

民國十三年蒙

大總統褒曰養潔白華束皙有補亡之作歌興青麥莊生言布施之難孝以立身仁能濟物兼而有之不可及也爾山西襄垣縣人王鴻儒者生有至性無間人言黃枕九齡蜚英乎江夏綵衣五色起舞乎老萊守馬援多藏之箴資財爲之散盡舉晏子同功之火遠近賴以生存行誼如茲褒揚允矣於戲敦百行者先乎孝地義天經活千人者後必封庭槐階桂畀以坊表光乃門望

邑人王維新爲撰其墓誌墓銘如次

王君諱鴻儒字超文襄垣人世居大黃莊村父鄉飲大賚文林郎諱永清嘗讓財產於兩兄艱苦自持專心向學以淡泊明志遺子孫君年五歲父卽以經傳口授之一聞不忘弱冠入邑庠旋以優等食廩餼學術重實用不務虛文乃屢困秋闈竟因考滿貢成均吏部註冊以訓導候詮晏如也平居設帳授

徒從遊者衆每學使案臨新入學弟子多出門下又豪俠好義鄉鄰告貸無不立應戚族之無力婚嫁者恒以一身任之婦女之守節而敦孝行必聞於有司請與褒揚他如創設小學遊行宣講種樹造林皆身爲之倡蓋學力之表見者也事親至孝二十四歲喪父四十六歲喪母俱哀毀幾滅性遇忌日必泫然泣邑人欽其行誼以聞於上蒙

大總統題褒宗族稱孝匾額並予黃綠二色綬銀質褒章以民國十三年陰歷二月二十九日卒距生於清咸豐六年四月二十九日春秋六十有九元配趙氏繼配王氏俱賢德可風子培鑾趙出也榮供京職歷任農商部辦事商標局股員孫天順高等小學肄業皆克家之孝子賢孫君子謂爲隱德之報焉銘曰

先生魁梧卓立不羣其德允爍其志光明博施濟衆排難解紛循然善誘桃李滿門孝以養親義以活人詩書教子禮樂貽孫克昌厥後蘭桂森榮永誌莫忘遂勒貞珉

孫安樂傳

孫安樂其字四休性剛直不苟言笑喜讀書博通經史弱冠入膠庠舉光緒壬寅歲貢其治家謹嚴門庭肅然子弟執經問字者嚴于師保有子二長業農次畢業高小校清宣統間安樂年已五旬好學不倦赴山西法政講習所研究自治畢業後任本邑自治事務所所長武昌起義山西響應襄人議立民團局選辦民團維持秩序適潞澤火案發生土匪滋擾仇學仇紳縣境諸機關停頓安樂不畏強暴不避嫌怨幫

助高令除奸鋤暴消患未然地方賴以保全後任參事會會長縣議會議長教育科職員縣志局纂修員均能克盡厥職沒於民國十四年春年近七旬鄉人思所以報之表其宅曰義人謂能以正義訓人足式一鄉云

王縉雲傳

王夏卿諱縉雲襄垣橋頭村人父廣慶以善封殖起家好義樂施鄉里稱之夏卿幼承庭訓儻有大志從師讀穎悟異常兒弱冠入邑庠詞章非其好也清德宗光緒二十九年入山西西學專齋治格致學於是窮究物理學日益進畢業得舉人被聘爲法政學堂教習復入專科賜進士出身辛亥革命充省垣晉民公會會員然未能盡其四方之志以爲中學在精神文明而物質文明當至歐美求之遂留學於英倫帝國大學當是時歐戰勃發波及全球於是著歐戰中之物理紀略謂保衛國家之要素如槍砲砲台子彈斷不可漠然視之曰德之所以能以四百萬衆東擊俄西攻英法比等國聯軍左右馳驅於兩大戰地者雖由於普魯西亞軍國民主義灌輸各個人腦筋而全國養成敵愾從王勇敢善戰之精神所致要亦由於所用之槍彈等器械駕各國而上也故歐洲各專門格致家對德人此次戰爭所用之軍械炸藥等物品非常注意研求而吾後進國家外交懸案擱置甚多將來尤必恃武力爲後援以外交爲前楯方能解決又曰此次列強戰爭最終之勝負不決之於俄八百五十萬法五百萬德四百五十萬雲雨之兵數而實決之於此鐵石無情之棉花火藥無烟火藥並克雷伯砲榴彈炮等器械也於是將德國製炸藥之

質料詳爲研究而紀載之以向國人又著千鈞一髮之教育一文都數萬言切中時弊兩文均登諸報紙民國五年返自英倫內務總長孫伯瀾以土木工程司主事見委因非素學辭未就改官農商部技正上任事無何被派往黑龍江省調查梧桐河金鑛報告所陳多被採擇其後國事日非實業不振部曹浮沈建樹無由遂萌歸去之思十一年豫省適倡兵工政策河東薛篤弼方筭財政夙有師友之誼力薦爲督署軍工參事兼中州大學及河南省農業專門學校教授用其學授生徒務以利用厚生相期勉歲餘奉農部令仍返京供職十四年冬以疾卒於官年四十有三初光緒季年襄垣學務興革伊始邑宰劉煥衢時多以此諮詢爲之擘畫胥中桀要而縣中教育大興夏卿之力居多其他言論造次情瀾不竭後進希其光彩朋輩挹其風流聞其歿多爲之歎惋不置也

孝義傳

孝義傳者其人性情之厚不愧爲獨行之儒舊以人物統之而中有孝義一類非不謂善善之從長也不若專述爲傳使人知姓字之足重也襄垣風俗敦厚諸人尤以孝義稱允足增光志乘矣

孝子

魏

楊引傳

楊引三歲喪父叔養之成人母九十二以疾終時引七十五歲矣猶哀毀過禮心恨不識父面追服斬衰食粥簷衣誓終厥身歷三十載哀慕不渝有司奏聞表其門曰純孝入鄉賢祠後魏誥封明御製孝行事實特賜收錄按舊志載無名氏輓楊引詩二首云

引當父喪甫三齡老母何堪晚亦傾罔極深恩嘆莫報徒令哀痛欲傷生

衰麻更著十年餘追服終身誓不渝豈獨姓名登宦籍詔書褒寵耀門閭

明

崔仲和傳

崔仲和廩生天性至孝母疾思飲河水適大旱絕流和露禱之漳絕復通取以獻母飲之遂愈聞者驚嘆

襄垣縣志

卷之三 孝義傳

三十四

後成明經任鄂縣知縣入鄉賢祠

連濟民傳

連濟民庠生父母相繼而歿枕塊獨居者五載不入內室屏絕酒肉但糲食而巳有司旌之

趙應格傳

趙應格家貧賣食爲生自奉儉而奉親獨厚委曲承順侍養不倦武邑侯給匾旌表

清

賈待旌傳

賈待旌任河南汝寧府信陽州事當庠生時逢闖寇之變其父元梓以捐助被執旌挺身代父受刑自辰至甲死而復甦嗣是父有疾服藥壽聖寺旌衣帶不解三月之間未嘗一出寺門後舉優桂學憲旌表闔邑稱純孝焉

賈燾傳

賈燾邑庠生事母惟命是從外祖父無嗣掃祭者三十餘年年至七旬凡遇祭期必步履而去及居親喪時值隆冬天氣甚寒赤足至百日三年內皆如古禮鄉黨咸推爲孝汪邑侯贈詩表揚之

李挺生傳

李挺生歲貢千子也母多病挺常憂戚因居家不仕凡甘脆醫藥必身親問視及父易簣挺哀毀骨立染

成大病明春掃墓痛哭仆地急救甦吐鮮血數口而卒遠近聞之僉稱其孝

郭士英傳

郭士英廩生事親至孝父病醫調罔效祈藥於潞城齊雲台往返二百餘里朝去暮返採藥跪進一年之久未嘗暫離父故哀毀骨立以憂父成疾卒鄉黨皆稱純孝

孟玠考傳

孟玠考授典史自幼失怙勵志成立竭力歸葬祖母代父盡禮奉母至耄餘不歸妻室始終不怠親弟四人撫恤完婚邑人咸稱孝友

馬士驥傳

馬士驥武生天性孝友其父處家甚嚴驥先意承順務求得其歡心日用飲食備極誠敬

劉漳劉泐劉美中合傳

劉漳廩貢生即佳鄉子也定省溫清先意承志且能柔聲下氣有古幾諫風劉泐係武生即啟宸之父竭力事親定省不輟且兄弟友愛永無爭競劉美中與其妻韓氏事繼祖母陳氏曲盡孝道始終如一說者謂劉氏一門多孝子云

曹林傳

曹林其父運元年過八旬雙足跛林傭工供父其妻武氏怡聲下氣竭力服事毫無怠心

黃運香傳

黃運香父母早逝居家甚貧事祖母李氏克盡孝道有伯父亡故遺伯母楊氏患腿疾臥床三年有餘香與其妻奉侍終身生養葬祭俱竭其力

許坦傳

許坦性至孝事繼父如生父父有腿病難於行出入孝子負之左右不離及卒痛毀幾絕葬後哀慕不已每飯必獻其天性誠懇如此子六孫十二人以爲孝德之感吳撫臺旌表疏云孝子純篤性成端方素著甫值髫齡之歲即諳循陔之儀有懷二人事嗣父善成厥志無愧九我啟後昆長發其祥堪爲倫常之矜式宜邀旌典以褒榮入忠義祠建坊府南門外

李德培傳

李德培乾隆甲午孝廉也童年失怙嘗以不及事父爲憾事寡母黃氏溫清定省自侍疾以至葬祭於禮有加無已奉母訓讀書品端學粹家居不仕終身不忘其親胡邑侯旌之今子孫蕃衍世繼書香咸豐辛酉建坊旌表入忠義祠

趙光彥傳

趙光彥父性嚴子先意承志不敢偶違事繼母亦如之年逾六旬而孝思不倦人稱孺慕不已

許永和傳

許永和幼失恃其奉厥父不敢違意事繼母申氏不異生母母病日久延醫求神終無怠志母病尋愈孝之所感如此

米福傳

米福家素貧耕田事親母病藥必親嘗雖時往于田而飲食疴癢無時不惓惓於親族黨咸稱其孝

劉滿海傳

劉滿海家貧如洗傭工以事其親母歿春秋致祭極誠總以不及奉生爲憾後侍繼母疾曲盡其孝鄉人稱之

李士達傳

李士達性至孝養生送死克盡其禮每屆其親冥辰輒感傷不食其孺慕之心存歿不二如此

孫子壯傳

孫子壯性孝友父積逋負數千金欲令諸子分爨各還其債子壯慨然曰親老弟幼何分爨爲願獨任其事厥後逋負清於諸弟更加體恤迄今家道復隆人謂孝友之報也

韓安慶傳

韓安慶庠生性謹厚幼失怙生母孔氏亦亡賴嫡母趙氏育養成立嘗以未報劬勞爲恨因竭力以事趙孝行多端不勝縷述及趙歿猶於韓氏宗祠出告反面無簡於禮聞者莫不嘆異

王暄傳

王暄庠生性純篤恪守庭訓不離左右父歿哀毀骨立依依孺慕終身不忘先是其父嘗欲建文昌閣於村南不果孝子力爲經營以繼其志且家奉木主每事必告久之若有見聞人驚爲異

趙炳文傳

趙炳文純孝性成始終無間同治年詳請旌表入忠義祠

趙萬青傳

趙萬青邑廩生賦性賢孝事繼母李氏能得其歡母子間無絲毫芥蒂李生三子萬青均愛之不異同胞萬青事繼母尤甚三子之事生母萬青歿繼母哭之慟廢食至死鄉人奇之咸謂孝友天賦公贈匾額武鄉拔貢李壬林題字其爲人也孝弟生前講學鄉間德化普著生徒奉匾曰化雨均霑鄉黨戚族之間或撫或恤無不措之適宜古稱不朽之業首推立德萬青能爲世人之所不能爲定省溫清之餘曲體親心使繼母不自知爲繼母諺云精誠所至金石爲開不爲虛語矣姚姬作許孝子傳謂生不能盡其孝而繼之以死爲可哀萬青之孝能使後母前子相忘於無形之中其母子之相得更爲可敬其有功名教非淺鮮矣古鄉先生歿而可祀於社者其斯人與其斯人與

義士

元

張甫傳

張甫家饒足五世同居鄉里義之至元初詔旌耆德義門明

王威吳伯雲郭復陳合傳

舊志載王威吳伯雲郭復陳俱於正統三年各輸粟一千以賑濟時艱有司奏聞英宗旌表其門以爲世法宜合傳之

王均慶傳

王均慶吏員任縣丞施財好義以陽澤門外木橋不能耐久乃捐貲數百金創修石橋以便往來迄今襄人賴焉又施地十畝爲先天觀基址邑南門外有碑碣

趙世濂傳

趙世濂鄉耆惠之子德行素著鄉里推重由吏員授懷安鎮巡檢甫三月告還居家惟耕田訓子爲事嘉靖八年歲大饑餓殍盈野濂不忍暴露卽於東城壕空坑數處收掩骸骼約數千計御史趙公鏜具奏旌表其門

邱彥常傳

邱彥常於崇正十年出銀一百兩助修城牆女塚又督理城工三年王邑侯賜冠帶牌匾又於崇正十三

襄垣縣志

卷之三 孝義傳

三十七

年命子彌高出粟十石救饑全活甚衆

清

崔洪憲傳

崔洪憲生員順治十八年荒旱下袁里人民流離錢糧盡欠洪憲乃查情欠數捐己貲納銀數百兩承翼張邑侯賜匾曰今之丈夫

劉瑤傳

劉瑤早起拾遺銀一封曰次必輸賦於公家者身家性命係焉坐以待之至午有號泣而來者自言我馬孟顯失去官銀十六兩零四錢今死矣瑤檢驗果符付之而去

米士扣傳

米士扣恤孤憐貧好善樂施康熙六十年歲饑村民賴其賑濟郭莊村道旁有碑石

郭崇安傳

郭崇安其兄崇山寄居潞邑早故憫嫂姪無依搬回本村將己業給與一半李邑侯給匾曰友于足式郝進郁傳

郝進郁好善樂施周濟鄉鄰施地二十畝爲本村昭澤王廟香火費

崔鍾瑤傳

崔鍾瑤捐己田二十畝置買橋板爲史水往來之便迴轅村靈山廟有石記

李生正傳

李生正恤孤憐貧正直好義康熙六十年境內大饑辦穀百餘石按戶給散妻邢氏事姑以孝聞乾隆十一年生正已卒鄉遭水災邢氏捐粟九十餘石按口賑饑克繼夫志

韓茂生傳

韓茂生吏員武生崙之父修葺橋廟樂於施金嚴邑侯表其門曰善可維風鄉黨贈匾曰功德流芳

張佐傳

張佐存心孝友慷慨樂施年六十奉侍慈幃左右就養勤謹親友有窮迫者予金周濟鄉人多敬重之乾隆十八年李邑侯給匾曰孝義足式

李均傳

李均鄉耆陸行次子負性孝友疏財樂施年七十七歲前後濟窮周急修橋施棺諸善事爲鄉人推重壬寅年給匾曰孝義堪揚

李將出傳

李將出從九品銜鄉飲正賓恤寡賑貧好善樂施鄉人咸頌之曰老善人道光八年邑侯張以七世同居親書義以爲上匾旌之題曰李將出與其從堂弟歲貢生將震太學生將巽恪承先志不析箸者累世矣

家惟耕讀重本也不事商賈遠利也咸有古風旌之以式鄉里逾年又贈對聯曰敦孝友睦嫻任恤書和親康樂安平

趙映奎傳

趙映奎附貢生直隸州州同銜居心純厚處世寬和尤好善樂施於邑中公事無不捐貲以成其美助修城工慨然倡捐三百金立有家塾凡戚族貧者招來就學且助其貲斧其他周急濟困睦族和鄰善行種種古道照人今鄉里咸以爲義行足式焉

梁錡傳

梁錡恩貢賦性慈惠好善樂施當清光緒三年大侵饑葶藶道曾捐己粟百餘石以周貧乏所活甚衆

李彬傳

李彬生性好義疏財樂施清光緒歲丁丑境內饑饉捐米濟貧克紹前徽與康熙年間大侵遠祖生正捐穀百餘石以賑災黎後前濟美其子生員占先精通醫學濟世活人長孫增生炳蔚曾在教育機關充應職務現任高小校教員數年之久正可見光於前者必裕於後也

王得熊傳

王得熊字瑞亭普頭村人性剛果不憚豪強當清乾隆十一年春因事往黎經石壑嶺有一人號伏道左近詢所以答遇賊十餘人毀目傷股却去行李問其時曰東下不過十餘里言次痛欲絕睹狀極慘遂以

拿賊鳴冤慨然慰之急追踪至黎邑北馬界警盜雄衆恐難敵暗賄土人特地報縣一面誘與談察其能爲相行人於隘路比捕將至則羣盜並獲無一逸網夥同押送至縣一訊俱伏轉咨到襄搶案遂結縣令嘉其義勇給以智力過人匾額以表其行

米錦田傳

米錦田字華圃郭莊村人性慷爽尙義氣扶顛濟困不遺餘力民國十一年三月蒙 大總統徐題褒任卹可風匾額以旌其門

米鴻來傳

米鴻來字子賓郭莊村人賦性純篤克紹先志年弱冠怙恃相繼失事繼母孝行甚著民國十一年三月蒙 大總統徐題褒孝闕流芳匾額用光門楣

栗剛傳

栗剛字健亭清增貢生性忠直而好義解紛排難不辭勞怨村有綽號紅眼狼者無賴時爲村人害剛勸之不悛遂袖鐵尺耍於道左痛擊之狼遂匿不敢爲非剛之名大著清宣統間曾充諮議局議員值起義返里同衆紳辦民團團警相訂剛置身於槍礮干戈之間極力排解旁觀者代爲惶恐剛則從容自若毫無懼色至兵禍相消乃已歲壬子縣內組織行政公署剛被推爲財政科副長繼長斯科又繼被選縣議

會議長辦事不畏強禦不事阿附好作不平鳴其急公也城北十里許南娥韓村之間舊有大橋一座介孔道坍塌多年行人躑躅剛捐貲八百餘串自任監工不需年而橋事告竣號普濟橋鄉人德之四十六卒於家剛賦性勇直不愛錢不怕死痛快淋漓往來縱橫於公共場中常爲附勢趨炎者所愁碍情護面者所快公事解決藉以免遷延少爭執亦晚運未流所不可少之人材也况捐貲建橋又合於西人不迷信之慈善事業乎

孫宗武傳

孫宗武字吳卿邑之後灣村人也少負大志嘗以豪傑自許好作不平鳴時清吏專制最惡多事者鄉人代爲危宗武夷然視之弱冠爲邑武生尋遊太原入武備學堂所交皆知名士感慨悲歌常欲聯同志以改造國家清光緒丁巳會各縣派送留日學生宗武亦作海外遊肄業日本高等警察學校因得徧交海外逋客志士前總統中山孫公痛清政不綱創設同盟會共謀革清廷之命宗武與焉各同志散布內地秘傳革命主義在教育界佔大多數宗武卒業歸國經同志解君介紹得充山西大學農林醫學鐵路各學堂體操教員正合宗武意也滿城者清駐防營之所在也界大學農林兩堂之間宗武不時爲學生述滿清之威嚴人民之困苦觸景傷懷自易動人不數年而同志甚衆歲辛亥武漢倡義山西響應宗武亦與其事事成而不爭其功嗚呼晚清末季名節掃地卽留學外國之士一行作吏輒忘所操守宗武精神所寄殺身成仁達其志而推賢讓能亦介推子房之流亞也歟其後清釐關弊於黎陽整頓警察於渾源

出所學以試牛刀備作異日之用而天不永年四十三而終蓋可惜也

邑人王維新賦詞以弔之其詞云憶君少年之慷慨兮慕朱家郭解之爲人念國事之艱難兮乘桴浮於東瀛注重尙武兮喚起國魂奔走共和兮謀覆滿廷辛亥紀元兮武昌起義三晉響應兮厥志克伸政治改革兮置身事外人貪天功兮吁嗟無奈匹夫有責兮再謀警政奮勇雁北兮中道星隕父柩未安兮老母猶在二子幼弱兮伊誰是賴豈性命不可期兮天數有定人皆六旬兮君胡五十而未盡已矣遠濁世而自臧兮以葆天德奉父靈於帝鄉兮聊盡子職國事之茫茫兮永卸其責子孫之繩繩兮留有遺澤魂兮魂兮雖死猶榮爰爲蕪詞兮敬弔先生

董興清傳

董興清字達德邑之平善鄉人性耿介處世不阿好里中有王姓者遭父喪無力葬埋助以粟又有族人董成之子三人被後母虐待即領其子養於家後均予之婚配俾成立焉又有紳衿某挾勢凌人興清每以正言斥責勢燄稍斂鄉黨多義之然尤好學里中之文人學士嘗敬慕焉長子道明令讀書遭光緒丁丑大侵綴學業商長孫守身生六月而其母見背興清視若掌珠衣食多寵愛之惟於讀書則訓戒綦嚴不稍寬後守身食廩餼敦品勵行興清爲之頤然而家庭嚴肅不容稍染惡習卒年七十有四子三人孫七八人曾孫十有二人皆優秀能守公訓以光大其業人謂其有德之報堪爲里黨之矜式也特傳其略云爾

王廣慶傳

王廣慶字有餘邑之橋頭村人業農賦性慈祥篤於孝友訓子有方次子縉雲留學英倫返國後贊助新政特著熱忱得力於庭訓者居多廣慶尤好公益如創建王三村祠堂並橋頭村私塾乃其卓著者也十一年十二月蒙 大總統錫以令德孔昭匾額紅黃綬銀質褒章並錫褒詞知次大總統褒曰孔門德行之科允矣首選魯殿靈光之頌巍然獨尊淵懿其心華貴其品兼而有之不可及也爾山西襄垣王廣慶生有至性無間人言吹白華之笙束皙作補亡篇什溫黃香之席江夏蜚無雙賢聲孔姑臧行冠州閭止桑梓之恭敬韓昌黎望崇山斗昭黼黻之文章行誼如茲褒揚宜畀於戲兩字名孝敬之里地以人傳十室有忠信之師善惟我擇作之坊表光乃門望

苗文章傳

苗文章城南大黃莊村人事親最孝家貧棄學業商生理於直隸大名府億輒屢中每年必返里省親省則曲盡其歡尤好施與凡族人與鄉黨之急難者無不出而撫救鄉人稱爲菩薩次子雨潤隨讀大名後被選參議院議員廉俸所得仍好施與十七年捐大洋叁千圓田地三拾畝在黃莊村北創設私立高初兩等小學校繼父志也文章可謂有子矣

民國十三年三月 大總統褒曰養潔白華束皙有補亡之什歌興青麥莊生慨布施之難孝於事親仁以收族兼而有之不可及也爾山西襄垣苗文章生有至性人無間言黃枕九齡早已齊名乎江夏彩衣

五色居然比德於老萊仿范文正之義莊同姓異姓以次普及序蘇明允之譜錄大宗小宗罔不周詳行誼如茲褒揚允矣於戲曾參輯孝經之書立身行道晏子舉同功之火舍己從人畀以楔題光乃矩訓武鄉縣清進士李華炳誌其墓云漢司馬子長撰貨殖列傳其中如端木氏陶朱公皆不徒貨殖名特因所託之業而名之要其志節之犖犖大者初不以是掩也自後世以商爲末務士大夫往往鄙夷一切豈知商界固有傑出之材其行誼爲士大夫所莫及者若苗君華甫非其錚錚者歟君諱文章世爲襄垣人苗其姓華甫其字也生而聰穎成章甫讀書卽能聯綴成文語嗣因家計絀棄儒業商然於聖賢經傳及古人之嘉言懿行均能心領神會期諸實行尤篤信因果報應之說暇輒爲鄉人及子侄輩徵引故事娓娓動聽先是君父商於豫之汝州歿之日商業折閱債負纍纍君時僅十八勉力支撐百計經營遺業賴以不墜豫有酒店原有君父所創設後讓與君之伯父年老無子以君爲嗣君事之一如所生年高風燭慮有不諱以安輿送之歸徒步相隨服持數百里無懈容嗣父所遺商店悉以讓之堂兄弟等而不與之爭淡泊明志安如也厥後君復商於大名閱事既久意輒中而不自矜炫遇事每以忍讓出之同業僉稱其德其孝友性成宅心仁厚類如此晚年歸里家道稍裕自奉極儉約而於戚鄰吉凶慶弔諸事及慈善義舉輒慷慨施無吝色亦無德容性鯁直鄉里有爭咸欲得一言以爲判次子雨潤將遊學東瀛時風氣未開戚友咸爲勸阻君獨毅然促其行且加勉焉其識量之遠又如此君卒於宣統二年八月十七日享年七十有一歲配連孺人處士銓公之女君服賈半生凡仰事俯畜一

切井臼縫紉等事孺人皆以一身任之常典質祀物以共甘旨鄉里以賢德稱性嗜佛不茹葷酒光緒丁丑歲大侵斷炊三日幾瀕於死適君自外携貲歸始克具饘粥自以爲信佛之報故每以憐貧恤寡勸其夫君之好義內助與有力焉享年八十歲卒於民國八年五月十四日子二長雨榮次雨潤由廩生留學日本歸後歷充諮議局省議會議員現充參議院議員女一適邢姓今歲癸亥君已葬數年窆窆旣安墓石未立雨潤以余有一日之長以狀來乞爲表墓余辭不獲已因附太史公之義爲叙其梗概而並系以銘曰

猗維苗君易儒而商經營弗懈孝養有方惟孝則友惟孝乃慈分財讓產樂善好施內助得賢克家有子寢熾寢昌介以繁祉佳城鬱鬱蘭桂森森勒茲貞石以詒後人

王生銀傳

王生銀字寶揚邑之東北陽人少孤貧事母至孝商於邑城晚則歸省不忍一日闕亘四十年不稍衰以勤儉仁孝治其家子侄輩皆奉命賦性急公好義鄉里之有急難者披髮纓冠而往救之事無大小每欲得一言以爲決村中廟宇重修村南建築石橋村北水溝築石坡皆生銀捐資提倡親監其工主持改良私塾作育人材村中學子多受其惠邑令李兆麟表其門閭贈以槐蔭遠被四字匾額後蒙 大總統贈以崔鄴遺風四字匾額並贈褒詞如次

大總統褒曰孔門德行之科冠政事文學而首列遷史游俠之傳與儒林貨殖相發明誠以修身齊家爲

治平之本輕財尚義率豪邁者流爾山西襄垣已故王生銀生有至性人無間言黃枕九齡早稱爲孝子紫荊三樹不謀及婦人造蔡襄之橋行旅無虞乎滅頂廣杜陵之廈寒士大慰乎歡顏行誼如斯褒揚允矣於戲顏烏題字具見孝思駟馬昌宗惟憑陰德作之坊表光乃矩型

衆議院議員平順石璜於褒揚碑陰記其事略云王公名生銀字寶揚山西襄垣縣東北陽村人生而穎異孝友性成七歲卽明事理十歲失怙事母至孝家貧無力讀半載輟學僅識之無十二歲卽操小販運業獲利必購鮮物獻其母長商於邑城距家三里早出夜歸定省之節亘四十年不稍衰胞弟生鈺少公三齡親如手足不幸半途折翼病至耳聾遺姪宇泰宇清視若己子教養婚配以至成人從弟生財早遭大故其母改適猶在襁抱領至己家加意撫養三娶三續生子成家孝友之聲閭里稱最公雖半途失學不恥下問好從賢士大夫遊暇則請求古聖賢之嘉言懿行必至心領神會踐諸實行中年之後學識有非大人先生所能及者故教育子姪也以勤儉以忠信篤敬其處世也救人急濟人難人有糾紛不解事常以魯仲連自任尤喜辦公益村南水濠深丈許因介孔道架木渡行人時虞危險公倡捐啟石橋人皆德之村北有溝數路水皆匯歸焉人憂其刷土壤路公又倡捐作石坡至今稱便公因失學感不便對村塾必極力主持請博學高才者掌教授清季年學堂初興人多罕異公領各學堂之所以優於私塾者身任管理就原改良之諸事立備後之人才迭出於村中有善良風俗者多公感化之力夫人李氏幼承閨訓深知婦道十七歲歸公處家教子一依夫志生子二女四長宇鴻次維

新宇鴻精岐黃術施藥救世公之教也維新字希文年最幼公夫妻愛之摯常以古聖賢言行是勗希文膝下承歡公諄諄告以一生所見所聞所處恒至午夜希文謹受命焉清光緒三十三年希文赴太原入山西大學民國三年遊日本肄業明治大學四年膺省立第四中學及第三師範教員之聘該兩校設在長治城內七年赴粵充衆議院議員與余同隸國會志同道合十一年赴北京充總統府顧問余亦北上仍充衆議院議員左右追隨前後共五六之久稱莫逆交故知公之家世甚詳希文處世接物概遵公訓誠佳士也娶妻盧女淑生兩隨希文赴粵亦幽閑貞靜生子憲中今五歲矣甚聰穎女素娟始七閱月肥胖可愛於戲其瓜瓞綿綿蠡斯衍慶繩祖武而貽孫謀者皆公之德行有以致之焉公生於道光二十八年七月十五日卒於光緒三十三年九月十九日享年六十歲夫人生於清道光二十六年十一月二十三日卒於民國十一年夏歷七月初八日享年七十有七謹述公夫人之事略列於

大總統褒揚碑之陰俾後之覽者將有感於斯文

又有內務部總長孫洪貽與衆議院議員苗雨潤等所作之墓誌墓表二篇另詳古蹟門內茲不再及附曾受褒揚者姓名及褒詞於次

苗雨榮褒辭

大總統褒曰孔門德行之科允矣首選魯殿靈光之頌歸然獨尊文獻能徵流風足式由來尙矣爲難能

焉爾山西襄垣縣苗紳雨榮至性過人鄉評邁衆標江夏無雙之譽溫席童年作廣微補亡之詩吹笙子舍彝倫攸叙神明可通訟仲弓之庭人慚非禮過康成之里盜竟洗心行誼如茲褒揚宜及於戲漢書立孝友傳以踐履篤實

郝映衡褒詞

民國十三年十一月 臨時執政題褒執義秉德四字匾額併褒詞一幅徽章一座臨時執政褒曰子產施乘輿之惠東里流芳士元有冠冕之稱南州著望急公好義博愛爲仁兼而有之不可及也爾山西襄垣郝映衡鄉評有素物望所歸造蔡襄之橋行人無憂乎失足廣杜陵之廈寒士大庇乎歡顏兒童誦君實之名好是耆英結社弟子志康成之學固應通德枋門行誼如斯褒揚允矣於戲垂馬援之誠多葦厚亡聞伯夷之風廉頑立懦畀以楔字光乃矩脩

